



**IOANNES PAULUS PP. II**  
SUMMI PONTIFICIS LITTERÆ ENCYCLICÆ  
**REDEMPTOR HOMINIS**  
AD VENERABILES FRATRES IN EPISCOPATU  
AD SACERDOTES ET RELIGIOSAS FAMILIAS  
AD ECCLESIE FILIOS ET FILIAS  
NECNON AD UNIVERSOS BONÆ VOLUNTATIS  
HOMINES  
PONTIFICALI EIUS MINISTERIO INEUNTE

Venerabiles fratres ac dilecti filii, salutem et apostolicam benedictionem

## I

**1. REDEMPTOR HOMINIS** Iesus Christus est centrum universi et historiae : ad eum mens Nostra et cor Nostrum convertuntur singulari hoc tempore, quod Ecclesia totaque humana familia, quae nunc est, transigunt. Re quidem vera haec ipsa aetas, qua post carissimum Decessorem Ioannem Paulum I Deus arcano consilio suo universale ministerium, cum Romana beati Petri Cathedra coniunctum, Nobis concedidit, anno bis millesimo iam admodum appropinquat. Nunc ipsum difficile est dicere, quid annus ille in rerum humanarum cursu sit ostensurus qualisque futurus singulis populis, nationibus, regionibus, continentibus, quamquam iam in praesenti conatus fiunt quosdam eventus praevidendi. Pro Ecclesia vero, Populo Dei, qui – licet ratione inaequali – usque ad extremos terminos terrae se extendit, annus ille erit annus magni Iubilaei. Accedimus iam ad illud tempus, quod – quamvis omnium emendationum, quas diligentia rei chronologicae postulat, respectus habeatur – memoriam afferet et peculiariter conscientiam renovabit primariae illius veritatis, qua fides innititur quamque Sanctus Ioannes in Evangelii initio proposuit : « Verbum caro factum est, et habitavit in nobis »;<sup>1</sup> et alibi : Sic enim dilexit

---

<sup>1</sup> Io 1, 14.

Deus mundum, ut Filium suum Unigenitum daret, ut omnis qui credit in eum non pereat, sed habeat vitam æternam ».<sup>2</sup>

Etiam nos quodam modo in tempore novi cuiusdam Adventus versamur, quod est tempus expectationis. « Multifariam et multis modis olim Deus locutus Patribus in Prophetis, in novissimis his diebus locutus est nobis in Filio... »<sup>3</sup>. In Filio dicimus, qui est Verbum quique homo factus est et ex Maria Virgine natus. Hac actione redemptrici cursus rerum humanarum, secundum divinum consilium amore plenum, fastigium attingit. Deus in historiam humani generis intravit et, ut homo, factus est eius « subiectum », unum quidem ex immensa multitudine, sed simul Unicum !

Per incarnationem Deus vitæ humanæ illam rationem tribuit, quam homini præbere intenderat ab ipso eius initio, eamque modo certo ac terminali, ac quidem more sibi tantum proprio et peculiari secundum æternum suum amorem et misericordiam, divina libertate plane servata : pariter vero eam præstitit illa cum liberalitate, quæ, si considerentur peccatum originale et universa series peccatorum generis humani, errata intellectus, voluntatis cordisque humani, nos sinit stupentes hæc verba Sacræ Liturgiæ repetere : « O

---

<sup>2</sup> Io 3, 16.

<sup>3</sup> Hebr. 1, 1 s.

felix culpa, quæ talem ac tantum meruit habere Redemptorem ! ».<sup>4</sup>

2. Ad Christum Redemptorem animi Nostri sensus et cogitationes die XVI mensis Octobris anno præterito direximus, cum, electione canonica peracta, interrogati sumus : Acceptasne ? Respondimus tunc : « In oboedientia fidei erga Christum meum, in fiducia erga Christi et Ecclesiæ Matrem – non obstantibus tantis difficultatibus – munus assumo ». Hanc responsionem Nostram nunc omnibus, sine ulla exceptione, publice patefacere volumus, hoc modo significantes cum primaria et fundamentali veritate Incarnationis, cuius facta est mentio, ministerium Nostrum conecti, quod, postquam Nos ad munus Episcopi Romæ et successoris Petri apostoli eligi sumus assensi, in hac ipsa eius Cathedra peculiare factum est officium Nostrum.

Assumpsimus eadem nomina, quæ sibi dilectissimus Decessor Noster Ioannes Paulus I imposuerat. Revera cum die XXVI mensis Augusti anno MCMLXXVIII ille Sacro Cardinalium Collegio enuntiaret se appellari velle Ioannem Paulum – cuius generis bina nomina antea numquam fuerant in historia Romanorum Pontificum – in iis luculentum perspeximus auspiciū gratiæ diviniæ novo Pontificatui obventuræ. Quoniam vero eius supremum ministerium vix triginta

---

<sup>4</sup> Ex Præconio paschali.

dierum spatio erat circumscriptum, Nostrum est non solum id pergere, sed etiam, quodam modo, resumere ab ipso eius exordio. Hoc confirmatur binis illis nominibus, quæ Nobismet indidimus. Ea Nobis imponendo, exemplo venerandi Nostrî Decessoris, cupimus, ut ille, amorem significare, quo singularem hereditatem prosequimur, quam Romani Pontifices Ioannes XXIII et Paulus VI Ecclesiæ reliquerunt, simul vero animum Nostrum paratum eam, auxiliante Deo, excolere ac promovere.

Per hæc bina nomina et per utrumque Pontificatum coniungimur cum universa traditione huius Apostolicæ Sedis et cum omnibus Decessoribus, qui fuerunt sæculi XX spatio et sæculis superioribus, revocantes Nos, prout res fert – ætatum variarum, etiam antiquissimarum, respectu habito – ad illam rationem muneris et ministerii, quæ Petri Sedi in Ecclesia locum prorsus peculiarem assignat. Ioannes XXIII et Paulus VI veluti stationem efficiunt, ad quam proxime referri Nos iuvat quasi ad limen quoddam, unde, una cum Ioanne Paulo I, iter instituere volumus versus tempus futurum ; in quo duci gaudemus fiducia, limitum nescia, et obtemperazione Spiritui, quem est Christus pollicitus suæque Ecclesiæ misit. Ipse enim ad Apostolos, instante Passione sua, dixit : « Expedi vobis, ut ego vadam. Si enim non abiero, Paraclitus non veniet ad vos ; si autem

abiero, mittam eum ad vos ». <sup>5</sup> « Cum autem venerit Paraclitus quem ego mittam vobis a Patre, Spiritum veritatis qui a Patre procedit, ille testimonium perhibebit de me ; sed et vos testimonium perhibetis, quia ab initio mecum estis ». <sup>6</sup> « Cum autem ad venerit ille, Spiritus veritatis, ducet vos in omni veritate : non enim loquetur a semetipso, sed quaecumque audiet loquetur, et quæ ventura sunt annuntiabit vobis ». <sup>7</sup>

**3.** Itaque plena hac fiducia Spiritus veritatis innixi, in uberem veluti hereditatem recentium Pontificatum ingredimur. Quæ quidem hereditas in conscientia Ecclesiæ penitus insidet ac quidem modo novissimo, alias numquam cognito, propter Concilium Vaticanum II, indictum et apertum a Ioanne XXIII atque postea feliciter clausum et perseveranter ad effectum adductum a Paulo VI, cuius operam et industriam Nosmet ipsi prope animadvertimus. Semper quidem ad altam eius sapientiam et fortitudinem obstupescebamus, necnon ad constantiam eius et patientiam difficili tempore Pontificatus eius, quod Concilium est subsecutum. Ut gubernator Ecclesiæ, navis Petri animum tranquillum et æquabilem provide servavit etiam in gravissimo discrimine, cum eadem navis intrinsecus concuti videretur : tum enim firmissime in spe soliditatis eiusdem navis

---

<sup>5</sup> Io 16, 7.

<sup>6</sup> Io 15, 26 s.

<sup>7</sup> Io 16, 13.

perstabat. Re quidem vera quod Spiritus dixit Ecclesiæ per Concilium temporibus nostris celebratum, quod per hanc Ecclesiam is dicit omnibus Ecclesiis,<sup>8</sup> id – quamvis paulisper perturbationes excitentur – ad nihil aliud conducit quam ad maiorem firmitatem totius Populi Dei, qui salvifici muneris sibi incumbentis est conscius.

Hæc ipsa, quæ Ecclesia sui conscia hac ætate sensit, Paulus VI præcipuum argumentum effecit Litterarum Encyclicarum, vim fundamenti habentium, quæ a verbis Ecclesiam Suam incipiunt ; ad has quippe Litteras liceat Nobis, in hoc primo et, ut ita dicamus, augurali documento huius Pontificatus Nostri, imprimis Nos referre et cum iis conectere. Con, scientia Ecclesiæ, a Spiritu Sancto illuminata atque suffulta magisque in dies excolenda, sive quod ad mysterium eius divinum sive quod ad missionem eius humanam sive etiam quod ad omnes eius humanas infirmitates attinet : hæc, dicimus, conscientia est ac manere debet primarius fons, unde amor Ecclesiæ ipsius scaturiat, perinde atque amor vicissim confert ad solidandam et acuendam conscientiam. Paulus VI ergo nobis reliquit testimonium acerrimæ huiusmodi conscientiæ Ecclesiæ. Per multiplices ac sæpe cum dolore coniunctas Pontificatus eius partes ac veluti elementa, intrepidum amorem erga Ecclesiam nos

---

<sup>8</sup> Cfr. Ap 2, 7.

docuit, quæ – quemadmodum Concilium affirmavit – est « veluti sacramentum seu signum et instrumentum intimæ cum Deo unionis totiusque generis humani unitatis ».<sup>9</sup>

4. Hac ipsa de causa conscientia Ecclesiæ coniungatur oportet cum animo cunctis patente, ita ut omnes in ea invenire valeant « investigabiles divitias Christi », <sup>10</sup> de quibus Apostolus gentium loquitur. Eiusmodi animus universis patens, sociatus cum conscientia propriæ naturæ et cum certitudine propriæ veritatis, de qua Christus dixit : « sermo... non est meus, sed Eius, qui misit me, Patris », <sup>11</sup> efficit apostolicum vigorem dynamicum, id est missionarium, Ecclesiæ, quatenus integre totam veritatem, a Christo acceptam, profitetur atque proclamat.

Ea autem simul colloquium persequi debet, quod Paulus VI in Encyclicis Litteris suis, a verbis Ecclesiam Suam incipientibus, « salutiferum colloquium » appellavit, singulos veluti circulos accurate distinguens, intra quos id esset faciendum.<sup>12</sup> Cum ergo in præsentī Nos ad hoc documentum, susceptas Pontificatus Pauli VI continens rationes, revocamus, Deo gratias hoc agere non desinimus, quod ille magni nominis

---

<sup>9</sup> Const. dogm. de Ecclesia Lumen Gentium, 1 : AAS 57 (1965), p. 5.

<sup>10</sup> Eph 3, 8.

<sup>11</sup> Io 14, 24.

<sup>12</sup> Cfr. Paulus PP. VI, Litt. Enc. Ecclesiam Suam : AAS 56 (1964), pp. 650 ss.



Decessor Noster idemque verus parens, « ad extra » manifestavit genuinum non vultum Ecclesiæ, quamvis hæc tempore Concilium subsecuto variis infirmitatibus interioribus afficeretur. Ita factum est, ut ivi etiam magna pars familiæ humanæ, in diversis multifariæ vitæ ipsius gradibus, magis conscia redderetur – quemadmodum opinamur – sibi vere necessariam esse Christi Ecclesiam, eius missionem, eius ministerium. Quæ conscientia interdum validior apparuit diversis se gerendi modis reprehensorum, qui Ecclesiam, eius instituta et compagem, necnon homines ecclesiasticos eorumque operam « ab intra » impugnabant. Hoc increbescens censuram faciendi studium e variis causis originem duxit, atque pro certo habemus, ceteroquin, id sincero amore erga Ecclesiam non caruisse. Sine dubio inerat in eodem, missis aliis rebus, voluntas superandi triumphalismum, qui dicitur ac de quo multus sermo erat Concilii tempore. Quodsi tamen æquum est Ecclesiam, exemplum Magistri sui secutam, qui « mitis erat et humilis corde », <sup>13</sup> et ipsam in humilitate inniti, eam sensu critico, ut aiunt, spectare omnia, quæ eius indolem et operam humanam efficiunt, necnon in se ipsam acerrime inquirere, simili ratione oportet illud censuræ faciendæ studium iustis finibus contineatur. Secus enim id esse desinit utile et fructuosum, neque veritatem et

---

<sup>13</sup> Mt. 11, 29.

amorem et animum gratiæ memorem commonstrat, cuius præcipue ac plene participes fimus in ipsa Ecclesia et per Ecclesiam. Præterea eiusmodi studium non propositum serviendi ostendit, sed potius voluntatem aliorum opinionem secundum propriam opinionem dirigendi, sæpius modo nimis inconsiderato divulgatam.

Gratia habenda est Paulo VI quod, reverenter observans quamlibet particulam veritatis, quæ in variis humanis opinionibus inesset, simul æquabilem constantemque rationem in officio gubernatoris navis <sup>14</sup> provide servavit. Ecclesia quidem, quam pæne statim post illum, Ioanne Paulo I vita functo, Nobis creditam accepimus, sine dubio non immunis est a difficultatibus et contentionibus interioribus. Simul vero ea intus firmior est ad nimium illud studium censorie in se ipsam inquirendi; quapropter dici potest eam validiore uti facultate critica adversus varias inconsideratas criticas rationes, fortius resistere

---

<sup>14</sup> Sunt hic memoranda præcipua documenta Pontificatus Pauli VI, nonnullorum ex quibus ipse mentionem fecit, cum intra Missam in Sollemnitate SS. Apostolorum Petri et Pauli anno 1978 orationem haberet: Litt. Encycl. Ecclesiam Suam: AAS 56 (1964), pp. 609-659; Ep. Apost. Investigabiles Divitias Christi: AAS 57 (1965), pp. 298-3011 Litt. Encycl. Mysterium Fidei: AAS 57 (1965), pp. 753-774; Litt. Encycl. Sacerdotalis Cælibatus: AAS 59 (1967), pp. 657-697; Sollemnis Professio Fidei: AAS 60 (1968), pp. 433-445; Litt. Enc. Humanæ Vitæ: AAS 60 (1968), pp. 481-503, Adhort. Apost. Quinque iam Anni: AAS 63 (1971), pp. 97-106; Adhort. Apost. Evangelica Testificatio: AAS 63 (1971), pp. 497-535; Adhort. Apost. Paterna cum Benevolentia: AAS 67 (1975), pp. 5-23.; Adhort. Apost. Gaudete in Domino: AAS 67 (1975), pp. 289-322; Adhort. Apost. Evangelii Nuntiandi: AAS 68 (1976), pp. 5-76.

multiplicibus novitatibus, maturiorem evasisse quoad spiritum discretionis, magis idoneam esse ad proferenda ex perenni thesauro suo « nova et vetera », <sup>15</sup> magis referri ad proprium mysterium et propter hæc omnia paratiorem esse ad munus cunctos salvandi : siquidem Deus omnes homines vult salvos fieri et ad agnitionem veritatis venire ». <sup>16</sup>

5. Ecclesia his temporibus, quamvis res contrariæ esse videantur, in communionem ministerii et in conscientiam apostolatus arctius cohæret. Oritur autem hæc cohærentia ex illo formæ collegialis principio, quod Concilium Vaticanum II proposuit quodque ipse Christus Collegio duodecim Apostolorum sub Petro capite inseruit et sine intermissione in Collegio renovat Episcoporum, ita ut magis ac magis toto orbe terrarum id crescat, cum Petri successore coniunctum et sub eius ductu existens. Concilium non tantum hoc formæ collegialis Episcoporum principium protulit, sed etiam quam maxime vivificavit, cum, missis aliis, stabile Institutum exoptaret, quod Paulus VI condidit, Synodum constituendo Episcoporum, cuius actio non solum Pontificatum Pauli VI novo pondere donavit, sed etiam postea, iam ab ipsis initiis, in Pontificatum Ioannis Pauli I eiusque indigni successoris manifesto redundavit.

---

<sup>15</sup> Mt 13, 52.

<sup>16</sup> 1 Tim 2, 4.

Huius formæ collegialis principium congruentissimum visum est hoc difficili post Concilium tempore, cum communis et concors mens Collegii Episcoporum – quod præsertim per Synodum significavit suam cum Petri successore unitatem – dubia removebat et simul idoneas ostendebat vias ad Ecclesiam, universalitatis eius ratione habita, renovandam. Potissimus enim e Synodo, præter alia, existit ad evangelizationem impulsus, Adhortatione Apostolica significatus, cui titulus est Evangelii Nuntiandi,<sup>17</sup> quæ tanto est animorum gaudio probata, utpote cum renovationis apostolicæ et pastoralis ratio haberetur. Eundem servavit modum Synodus Episcoporum in postrema ordinaria sessione, quæ uno fere anno acta est, antequam Paulus VI est mortuus, et, ut constat, de catechesi tractavit. Cuius consessus fructus Sedi Apostolicæ adhuc ordinandi sunt et palam exponendi.

Cum de manifesta progressionem formarum, quibus collegialis ratio Episcopatus significatur, agamus, oportet saltem memoremus quo cursu Conferentiæ Episcopales nationales in Ecclesia universa aliique collegialis compaginis modi, sive internationales sive cuiusvis continentis propriæ, sint stabiliti. Quod autem ad perantiquum Ecclesiæ morem attinet, est Synodorum localium

---

<sup>17</sup> Pauli PP. VI, Adhort. Apost. Evangelii Nuntiandi : AAS (1976). pp. 5-76.

opera illustranda. Hæc enim Concilii mens et sententia fuit – a Paulo VI congruenter ad effectum adducta – ut huiusmodi instituta, per sæcula ab Ecclesia experiendo probata, sicut et ceteræ rationes cooperationis collegialis Episcoporum – veluti metropolia, quæ dicitur, ne de singulis commemoremus dioecesibus – suæ identitatis suæque propriæ indolis plene consciæ in communi Ecclesiæ unitate ferverent. Sacerdotes quoque eodem imbuuntur animo, quo sentiunt se in operando socios et veluti consponsos esse ; idque multis Consiliis presbyteralibus, post Concilium ortis, confirmatur. Laicos etiam penetrat hic sensus, quo non tantum apostolatus laicalis compages iam exstantes solidatæ sunt, sed etiam novæ, natura quidem sæpe dissimiles et summa præditæ alacritate, sunt conditæ. Laici præterea, non ignorantes conscientiæ officium, quo circa Ecclesiam teneantur, Pastoribus et iis, qui Instituta vitæ Deo consecratæ repræsentant, in Synodis dioecesanis vel in Consiliis pastoralibus paroeciarum et diocesium adiutricem operam libenter præbuerunt.

Nostrum Nobis Pontificatum ordientibus hæc omnia perpendenda sunt, ut Deo gratias agamus atque impense omnes Fratres et Sorores confirmemus et memori ardentique mente operam commemoremus Concilii Vaticani II ac præclaros Decessores Nostros, qui novum hunc

quasi fluctum Ecclesiae vitæ. iudicii dubitationis, ruinæ et discriminis multo validiorem, concitarunt.

6. Et quid dicendum de inceptis, e novo oecumenico cursu exortis? Ioannes XXIII, Summus Ecclesiae Pastor sempiterna memoria dignus, evangelica cum perspicuitate existimavit quæstionem de Christianis in unum redigendis initium capere, ut par est, ab ipsius Iesu Christi, Magistri nostri, voluntate, quam is sæpe declaravit quamque præsertim in precatone, instante morte sua in Cenaculo facta, enuntiavit: «Rogo... Pater... ut omnes unum sint».<sup>18</sup> Breviter huic postulationi Concilium Vaticanum II Decreto de oecumenismo satisfecit. Summus Pontifex Paulus VI, adiuvante Secretariatu ad Christianorum unitatem fovendam, primos expertus est haud faciles conatus ad hanc unitatem consequendam. Longene in hac via processimus? Nolentes quidem ad hoc particulatim respondere, id saltem possumus affirmare: nos veros magnique momenti progressus fecisse. De hoc enim constat: nos perseveranter congruenterque esse operatos et nobiscum etiam eos, qui alias Ecclesias aliasque Communitates christianas repræsentarent, in rem instituisse, de quo iis sincero sumus animo grati.

Verum est præterea hoc Christianitatis mundique statu non aliam, ut videtur, præberi

---

<sup>18</sup> Io 17, 21; cfr. ibidem, 17, 11, 22 s.; 10, 10; Lc 9, 49 s. 54.

facultatem munus universale Ecclesiæ, quod ad quæstiones oecumenicas pertinet, implendi quam studium fideliter, perseveranter, humiliter atque etiam audacter vias exquirendi, ad accessum et unitatem aptas, quemadmodum ipse Pontifex Paulus VI exemplo suo comprobavit. Oportet igitur unitatem quæramus, difficultatibus in eiusmodi via vel occurrentibus vel increbrescentibus non succumbentes ; secus nec verbo Christi servaremus fidem, nec eius efficeremus testamentum. Num hoc periculum licet obire ?

Non defuerunt qui, in res arduas incidentes vel eventus primorum oecumenicorum coeptuum irritos iudicantes, se retrahere vellent. Quidam immo arbitrantur hos conatus Evangelii causæ nocere, etiam graviolem in Ecclesia concitare discordiam, notiones in rebus fidei et morum confusione perturbare, ad singularem quandam in re religiosa indifferentiam ducere. Etsi fortasse expedit, ut hæc opinantes iure declarent ea, quæ timent, tamen et hic est iustus modus adhibendus. Non est dubium quin hoc vitæ Ecclesiæ novum tempus postulet, ut nos fide nitamur imprimis scienti, penitus percepta, necnon suscepti officii conscia. Vere oecumenice agere idem est ac patescere, appropinquare, paratum esse ad colloquendum, una veritatem inquirere perfecto evangelico et christiano sensu ; sed nullo pacto idem valet nec valere potest ac deponere vel

quavis ratione lædere divinæ thesauros veritatis, quam Ecclesia continenter affirmavit et docuit. Omnes, qui, qualibet de causa, velint Ecclesiam dehortari, ne communem Christianorum unitatem consecratur, adhuc interrogandi sunt: num id licet nobis omittere? Num – infirmitate humana erratisque priorum sæculorum non obstantibus – gratiæ Domini nostri non confidere possumus, quæ postremis temporibus per verbum Spiritus Sancti apparuit, quod in Concilio audivimus? Si sic faceremus, veritatem negaremus ad nos ipsos spectantem, quam Apostolus tam significanter extulit: « Gratia Dei sum id quod sum, et gratia eius in me vacua non fuit ».<sup>19</sup>

Idem, quamquam aliter debitisque inductis distinctionibus, dicendum est de illa opera, quæ adeundos curat eos, qui religiones non christianas repræsentant et quæ fit colloquia habendo, communicando, simul orando, humanæ religiositatis divitias exquirendo, quæ, ut bene novimus, ne harum quidem religionum sectatoribus desunt. Nonne interdum firma persuasio non christianas religiones profitentium – quæ et ipsa procedit a Spiritu veritatis, extra fines aspectabiles Corporis mystici operante – forsitan confundat Christianos, ad dubitandum de veritatibus a Deo revelatis et ab Ecclesia nuntiatis sæpe tam proclives ac tam pronos ad infirmanda principia doctrinæ moralis et ad aperiendam viam

---

<sup>19</sup> 1 Cor 15, 10.



licentiæ cuncta in re ethica permittendi ? Paratum esse ad quemlibet hominem animo comprehendendum, ad quodlibet systema inquirendum, ad iusta probanda, pulchrum est : sed nequaquam id significat certam suam fidem amittere <sup>20</sup> vel morum legem infirmare, cuius defectus brevi in vitam cunctarum societatum incidet, secum, præter alia, dolendos afferens effectus.

## II

7. Si viæ, in quas Concilium immisit Ecclesiam huius sæculi quasque nobis ostendit primis suis Encyclicis Litteris Summus Pontifex Paulus VI, vita defunctus, diu omnino illæ manebunt, quæ nobis sint tenendæ, iure tamen possumus, hoc novum ingressi tempus, nos interrogare : Quid ? Qua ratione progrediendum ? Quid est agendum, ut, in novo huiusmodi Ecclesiæ Adventu, coniuncto cum altero mille annorum spatio iam exeunte, accedamus ad eum, quem Divinæ Litteræ vocant « semper Patrem », « Patrem futuri sæculi » ? <sup>21</sup>Hoc est potissimum novo Pontifici quærendum, cum in oboedientia fidei assentitur præcepto, quod Christus non semel Petro dedit : « Pasce agnos meos » :<sup>22</sup> quod idem valet ac Pastor sis ovilis mei ; et postea :

---

<sup>20</sup> Cfr. Conc. Oec. Vat. I Const. dogm. de Fide catholica Dei Filius, Cann. III. De fide, n. 6 : Conciliorum Oecumenicorum Decreta, Ed. Istituto per le Scienze Religiose, Bologna 1973, p. 811.

<sup>21</sup> Is 9, 6.

<sup>22</sup> Io 21, 15.

« Et tu, aliquando conversus, confirma fratres tuos ».<sup>23</sup>

Hic prorsus, carissimi Fratres, Filii et Filiae, princeps et præcipuum quiddam respondeamus necesse est: nobis scilicet animus impellendus est, intellectus, voluntas, cor ad unum Christum, Redemptorem nostrum, sunt dirigenda, ad Christum, hominis Redemptorem. Eum aspicere volumus, quia in eo tantummodo, Dei Filio, est salus, cum Petro dicentes: « Domine, ad quem ibimus? Verba vitæ æternæ habes ».<sup>24</sup>

Per ipsius Ecclesiæ conscientiam, tantopere a Concilio dilatata, per omnes huius conscientiæ gradus, per cunctas regiones operis, ubi Ecclesia se declarat segue reperit et confirmat, constanter debemus ad eum tendere, qui « est caput », <sup>25</sup>ad eum, « ex quo omnia et nos in illum », <sup>26</sup>ad eum, qui simul est « via et veritas », <sup>27</sup> porro « resurrectio et vita », <sup>28</sup> ad eum, quem videntes, nos Patrem videmus, <sup>29</sup> ad eum, qui debuit abire a nobis, <sup>30</sup> – scilicet per mortem in Cruce ac deinde per Ascensionem in cælum – ut Paraclitus ad nos veniret, immo etiam nunc tamquam Spiritus

---

<sup>23</sup> Lc 22, 32.

<sup>24</sup> Io 6, 68; cfr. Act 4, 8-12.

<sup>25</sup> Cfr. Eph 1, 10. 22; 4; 25; Col 1, 18

<sup>26</sup> 1 Cor 8, 6; cfr. Col 1, 17.

<sup>27</sup> Io 14, 6.

<sup>28</sup> Io 11, 25.

<sup>29</sup> Cfr. Io 14, 9.

<sup>30</sup> Cfr. Io 16, 7.

veritatis indesinenter veniat.<sup>31</sup> In eo sunt « omnes thesauri sapientiæ et scientiæ »<sup>32</sup> eiusque corpus est Ecclesia.<sup>33</sup> Ecclesia est « in Christo veluti sacramentum seu signum et instrumentum intimæ cum Deo unionis totiusque generis humani unitatis » ;<sup>34</sup> et horum omnium fons ille est ! Ille ipse ! Ille Redemptor !

Non desinit Ecclesia eius audire sermones, quos continenter quidem repetit, dum summa cum pietate singulas vitæ ipsius particulas instaurat. Hi sermones item audiuntur a non Christianis. Vita Christi loquitur eodem tempore ad tot homines, qui nondum cum Petro iterare valent : « Tu es Christus, Filius Dei vivi ».<sup>35</sup> Ille, Filius Dei viventis, loquitur ad homines etiam sicut homo : nam loquitur ipsa eius vita, eius humanitas, eius fidelitas erga veritatem, amor eius, qui omnes complectitur. Præterea loquitur illius mors in Cruce, nempe inscrutabilis magnitudo dolorum eius et solitudinis. Numquam desinit Ecclesia vivendo recolere eius mortem in Cruce ac Resurrectionem, quæ substantiam efficiunt vitæ cotidianæ eiusdem Ecclesiæ. Etenim ex mandato Christi ipsius, sui Magistri et Domini,

---

<sup>31</sup> Cfr. Io 16, 7. 13.

<sup>32</sup> Col 2, 3.

<sup>33</sup> Cfr. Rom 12, 5 ; 1 Cor 6, 15 ; 10, 17 ; 12, 12. 27 ; Eph 1, 23 ; 2, 16 ; 4, 4 ; Col 1, 24 ; 3, 15.

<sup>34</sup> Conc. Oecum. Vat. II, Const. dogm. de Ecclesia Lumen Gentium, 1 : AAS 57 (1965), p. 5.

<sup>35</sup> Mt 16, 16.

celebrat Ecclesia sine intermissione Eucharistiam, in qua « fontem vitæ et sanctitatis »<sup>36</sup> detegit, signum efficax gratiæ necnon reconciliationis cum Deo, pignus vitæ æternæ. Ecclesia vivendo recolat eius mysterium indeque sine ulla fatigatione haurit ; immo assidue quærit vias, quibus idem sui Magistri et Domini mysterium propius adducere possit ad hominum genus : ad populos, ad nationes, ad succedentes sibi ætates, ad quemque hominem singillatim, quasi iugiter secundum Apostoli dicitur exemplum : « Non enim iudicavi scire me aliquid inter vos nisi Iesum Christum et hunc crucifixum ».<sup>37</sup> Ecclesia versatur intra orbem Redemptionis mysterii, quod profecto vitæ eius atque operis fundamentale principium est factum.

**8. Mundi Redemptor !** In quo, modo novo et mirabiliore, revelata est veritas principalis de creatione, quam Liber Genesis testatur, cum sæpius memorat : « vidit Deus quod esset bonum ».<sup>38</sup> Bonum autem ex Sapientia oritur et ex Amore. In Iesu Christo mundus aspectabilis, propter hominem a Deo effectus <sup>39</sup> – mundus iste, qui cum peccatum eo intrasset, vanitati subiectus est <sup>40</sup> – pristinum suum vinculum cum

---

<sup>36</sup> Cfr. Litaniam SS. Cordis Iesu.

<sup>37</sup> 1 Cor 2, 2.

<sup>38</sup> Cfr. Gen 1, passim.

<sup>39</sup> Cfr. Gen 1, 26-30.

<sup>40</sup> Rom 8, 20 ; ibidem, 8, 19-22 ; Conc. Oecum. Vat. II, Const. de Ecclesia in mundo huius temporis Gaudium et Spes, 2 ; 13 : AAS 58 (1966), pp. 1026 ; 1034 s. 15.

eadem divina origine Sapientiæ et Amoris recuperat. « Sic enim dilexit Deus mundum, ut Filium suum Unigenitum daret ».<sup>41</sup> Quemadmodum in homine-Adamo vinculum illud diruptum erat, ita in Homine-Christo id rursus est astrictum.<sup>42</sup> Nonne persuadent nobis, vicesimi sæculi hominibus, verba Apostoli cum eloquentia mirabili prolata de creatura, quæ « congemiscit et comparturit usque adhuc »,<sup>43</sup> atque impatienter « revelationem filiorum Dei expectat », de creatura nempe, quæ « vanitati subiecta est »? <sup>44</sup>Nonne ipsi illi ingentes progressus, antehac incogniti, præsertim qui nostro hoc volvente sæculo evenerunt in provincia dominationis mundi, quæ fit ab homine, patefaciunt multo magis quam prius umquam istam subiectionem « vanitati »? Quædam tantum commemorare sufficit: cuius generis sunt impendens locorum contaminatio in regionibus subito repletis multitudine sedium quæstuosæ industriæ, pugnæ armatorum continenter coorientes ac recrudescentes, fatta iam potestas extinctionis propriæ ex usu armorum atomicorum, hydrogenicorum, neutronicorum et similium, deficiens reverentia erga vitam nondum natorum. Nonne novæ huius

---

<sup>41</sup> Io 3, 16.

<sup>42</sup> Cfr. Rom 5, 12-21.

<sup>43</sup> Rom 8, 22.

<sup>44</sup> Rom 8, 19.

ætatis mundus, mundus itinerum ætheriorum ac victoriarum scientificarum technicarumque antea numquam reportatarum, simili creatura est, quæ « congemiscit et comparturit »<sup>45</sup> atque impatienter « revelationem filiorum Dei exspectat » ?<sup>46</sup>

Concilium Vaticanum II in subtili sua perscrutatione « mundi huius temporis » pervenit ad punctum, quod in toto aspectabili mundo est maximi ponderis : ad ipsum hominem, cum, sicut Christus, in penetralia humanæ conscientiæ descenderet tangeretque interius hominis mysterium, quod sermone biblico (atque etiam non biblico) verbo « cordis » significatur. Christus mundi Redemptor ipse modo unico neque iterabili in hominis mysterium penetravit eiusque « cor » est ingressus. Recte igitur docet Concilium Vaticanum II : « Reapse nonnisi in mysterio Verbi incarnati mysterium hominis vere clarescit. Adam enim, primus homo, erat figura futuri (Rom 5, 14), scilicet Christi Domini. Christus, novissimus Adam, in ipsa revelatione mysterii Patris Eiusque amoris, hominem ipsi homini plene manifestat eique altissimam eius vocationem patefacit ». Itemque deinde : « Qui est imago Dei invisibilis » (Col 1, 15), Ipse est homo perfectus, qui Adæ filiis similitudinem divinam, inde a primo peccato deformatam, restituit. Cum in Eo natura humana assumpta non perempta sit, eo ipso etiam in

---

<sup>45</sup> Rom 8, 22.

<sup>46</sup> Rom 8, 19.

nobis ad sublimem dignitatem everta est. Ipse enim, Filius Dei, incarnatione sua cum omni homine quodammodo Se univit. Humanis manibus opus fecit, humana mente cogitavit, humana voluntate egit, humano corde dilexit. Natus de Maria Virgine, vere unus ex nostris factus est, in omnibus nobis similis excepto peccato». <sup>47</sup> Ipse, hominis Redemptor !

9. Iterum perpendentes admirandum hunc Magisterii Concilii locum, minime obliviscimur, ne unum quidem temporis rnementum, Iesum Christum Filium Dei viventis factum esse reconciliationem nostram apud Patrem. <sup>48</sup> Ipse nominatim, ipse solus æterno satisfecit Patris amori, illi videlicet paternitati, quæ ab initio sese demonstravit in mundi creatione, in fatta homini donatione cunctarum creationis divitiarum, cum illum constitueret « paulo minus ab angelis », <sup>49</sup> formatum, id est « ad imaginem et similitudinem » Dei ; <sup>50</sup> pariter satisfecit illi Dei paternitati atque amori, quem homo quadam ratione repudiavit, cum primum foedus <sup>51</sup> violaret ac sequentia pariter foedera, quæ Deus pluries hominibus obtulit. <sup>52</sup> Redemptio mundi – hoc tremendum

---

<sup>47</sup> Const. past. de Ecclesia in mundo huius temporis Gaudium et Spes, 22 : AAS 58 (1966), pp. 1042 s.

<sup>48</sup> Cfr. Rom 5, 11 ; Coi 1, 20.

<sup>49</sup> Ps 8, 6.

<sup>50</sup> Cfr. Gen, 1, 26.

<sup>51</sup> Cfr. Gen 3, 6-13.

<sup>52</sup> Cfr. Missale Romanum, IV Prex Eucharistica.

amoris mysterium, in quo creatio renovatur<sup>53</sup> – est profecto secundum intimam suam naturam plenitudo iustitiæ in corde humano : in corde Primogeniti Filii, ut ea fieri possit cordis iustitia multorum hominum, qui in ipso quidem Filio Primogenito iam prius ab æternitate destinantur, ut filii Dei fiant,<sup>54</sup> et ad gratiam vocantur, invitantur ad amorem. Crux illa in Calvario, per quam Iesus Christus-Homo – filius Mariæ Virginis, filius putativus Ioseph Nazarethani – « relinquit » hunc mundum, nova simul est demonstratio æternæ paternitatis Dei, qui in illo rursus accedit ad hominum genus, ad unumquemque hominem, cui ter sanctum « Spiritum veritatis »<sup>55</sup> largitur.

Per hanc Patris revelationem effusionemque Spiritus Sancti, quæ in Redemptionis mysterio indelebile imprimunt signum, explanatur significatio Crucis ac mortis Christi. Deus creationis sese exhibet Deum Redemptionis, uti Deum, qui « fidelis est »,<sup>56</sup> scilicet fidelis amori suo erga hominem et erga mundum, ipso creationis die iam patefacto. Qui amor non recedit ab ulla prorsus re, quam in illo poscit iustitia. Idcirco Deus Filium, « qui non noverat

---

<sup>53</sup> Cfr. Conc. Oecum. Vat. II, Const. past. de Ecclesia in mundo huius temporis Gaudium et Spes, 37 : AAS 58 (1966), pp. 1054s ; Const. dogm. de Ecclesia Lumen Gentium, 48 : AAS 57 (1965), pp. 53s.

<sup>54</sup> Cfr. Rom 8, 29s. ; Eph 1, 5.

<sup>55</sup> Cfr. Io 16, 13.

<sup>56</sup> Cfr. 1 Th 5, 24.



peccatum, pro nobis peccatum fecit ». <sup>57</sup> Si autem « peccatum fecit » eum, qui usquequaque omni caruit peccato, istud quidem fecit, ut amorem ostenderet, qui maior semper est omnibus rebus creatis, amorem dicimus, qui ipse ille est, nam « Deus caritas est ». <sup>58</sup> Sed amor imprimis maior est quam peccatum et debilitas et vanitas creaturæ, <sup>59</sup> morte est fortior ; paratus semper porro amor est ad levandum, ad ignoscendum, ad obviam procedendum filio prodigo, <sup>60</sup> ad conquirendam « revelationem filiorum Dei », <sup>61</sup> qui « ad futuram gloriam » <sup>62</sup>vocantur. Hæc vero amoris patefactio nominatur etiam misericordia ; <sup>63</sup> eiusmodi denique ostensio amoris ac misericordiæ accipit in hominum historia formam suam et appellationem : vocatur Iesus Christus.

**10.** Homo sine amore vivere nequit. Sibimet manet quiddam, quod incomprehensibile est, eiusque vita sensu privatur, nisi amor ei præbetur, nisi invenit amorem, nisi amorem experitur suumque efficit, nisi penitus amorem participat. Ob hanc omnino causam Christus Redemptor, ut iam dictum est, hominem ipsi homini plene manifestat. Et illa est – si ita quidem loqui licet –

---

<sup>57</sup> 2 Cor 5, 21 ; cfr. Gal 3, 13.

<sup>58</sup> 1 Io 4, 8. 16.

<sup>59</sup> Cfr. Rom 8, 20.

<sup>60</sup> Cfr. Lc 15, 11-32.

<sup>61</sup> Rom 8, 19.

<sup>62</sup> Cfr. Rom 8, 18.

<sup>63</sup> Cfr. S. Thomas, Summa Theol. III, q. 46, a. 1, ad 3.

humana ratio et proprietas mysterii Redemptionis. In ea vicissim homo magnitudinem suæ humanitatis et dignitatem et pretium proprium denuo detegit. In Redemptionis mysterio homo iterum « exprimitur » et aliquo patto iterum creatur. Profecto ipse iterum creatur ! « Non est Iudæus neque Græcus, non est servus neque liber, non est masculus et femina : omnes enim vos unus estis in Christo Iesu ». <sup>64</sup> Homo igitur, qui funditus se perspicere cupit – non tantum secundum quasdam subitarias, imperfectas, sæpe exteriores, immo etiam specie sola apparentes rationes aut regulas suæ vitæ – debet sese ad Christum conferre cum sua anxietate et dubitatione, cum sua infirmitate et improbitate, cum vita sua et morte. Is debet quasi cum toto, quod ipse est, intrare in eum ; debet « asciscere » atque assumere sibi omnem veritatem Incarnationis et Redemptionis, ut rursus se reperiat. Qui intimus processus si in illo perficitur, homo fructus edit non sola Dei adoratione, verum etiam magna sui ipsius admiratione. Quantum enim momentum ac pretium habere debet homo in conspectu Creatoris, si « talem ac tantum meruit habere Redemptorem », <sup>65</sup> si Deus dedit « Filium suum

---

<sup>64</sup> Gal 3, 28.

<sup>65</sup> Ex Præconio paschali.

Unigenitum », ut homo « non pereat sed habeat vitam æternam » ?<sup>66</sup>

Re quidem vera miratio maxima illa de pretio ac dignitate hominis nuncupatur Evangelium, id est Bonus Nuntius. Vocatur item Christianismus. Ex eadem ipsa admiratione proficiscitur Ecclesiæ munus in hoc mundo, immo ac fortasse etiam magis « in mundo huius temporis ». Hæc porro miratio simulque persuasio et certitudo – quæ suapte intima natura est ipsa certitudo fidei, sed quæ abscondito et arcano modo vivificat omnem partem veri humanismi – coniungitur arcte cum Christo. Ea etiam statuit locum Christi ac – si ita fas est dicere – peculiare eius ius civitatis in historia hominis hominumque generis. Ecclesia, quæ contemplari non cessat totam mysterii Christi summam, novit ex certa sua fide Redemptionem per Crucem effectam reddidisse homini in perpetuum dignitatem suam ac sensum existentiae in mundo, quem nempe sensum magna ex parte propter peccatum amisit. Quocirca Redemptio peracta est in ipso Paschatis mysterio, quod per Crucem mortemque ad Resurrectionem perducit.

Primarium ergo Ecclesiæ officium omni, sed præsertim hac nostra ætate, est dirigere hominis mentem ac tendere conscientiam et experientiam universi hominum generis ad Christi mysterium, omnes homines adiuvarè, ut in vita cotidiana

---

<sup>66</sup> Cfr. Io 3, 16. 20.

altitudinem Redemptionis percipiant, quæ in Iesu Christo contingit. Eodem tempore tractantur etiam intimarum rerum hominis fines : regionem dicimus humanorum cordium et conscientiarum eventuumque humanorum.

**11.** Concilium Vaticanum II opus absolvit sane immensum, ut plena illa et universalis conscientia Ecclesiæ formaretur, de qua Summus Pontifex Paulus VI primis in suis Encyclicis Litteris scripsit. Conscientia hæc – vel potius conscientia sui ipsius, Ecclesiæ propria – efficitur in « dialogo », qui, priusquam fiat colloquium, converti debet ad « alterum », ad emn scilicet, quocum colloqui volumus. Concilium Oecumenicum fundamentalem vim contulit ad fingendam conscientiam sui ipsius, Ecclesiæ propriam, cum nobis tradidit modo tam apto et consentaneo conspectum totius terrarum orbis veluti « tabulam » geographicam variarum religionum. Præterea ostendit, qua ratione super hanc « tabulam » religionum mundi superponatur, certis quibusdam gradibus servatis – antehac numquam cognitis ac nostræ ætatis omnino propriis – atheismus ipse secundum diversas suas formas, imprimis atheismus secundum certas agendi rationes exhibitus, organice dispositus, intra politicam quandam compagem ordinatus.

Ad religionem vero quod attinet, Concilium ante omnia pertractat religionem ut rem universalem, cum historia hominis iam inde a

principio consociatam ; deinde plures considerat variasque religiones non christianas ac postremo ipsum Christianismum. Documentum Concilii religionibus non christianis dicatum abundat nominatim permagna æstimatione præstantium spiritualium bonorum, immo illius principatus eorum, quæ spiritalia sunt quæque intra generis humani vitam recipiunt propriam affirmationem in ipsa religione proindeque in morali dottrina, quæ in totum humanum cultum redundat. Recte quidem Ecclesiæ Patres cernebant diversis in religionibus totidem imagines unicæ cuiusdam veritatis tamquain « semina Verbi », <sup>67</sup> quæ testantur vehementissimum mentis humanæ desiderium, ex quo dirigi cupit – etsi variis viis – in unam dumtaxat partem : quod patescit Dei ipsius conquisitione ac simul – per eandem illam intentionem versus Deum – conquisitione plenæ significationis generis humani sive sensus plenæ vitæ humanæ. Concilium devovit peculiare studium religioni Iudaicæ, magnum illum thesaurum spirituales commemorane, qui Christianis et Hebræis est communis, atque se existimare ostendit illos, qui Islamicam religionem

---

<sup>67</sup> Cfr. S. Iustinus, I Apologia, 46, 1-4 ; II Apologia, 7 (8), 14 ; 10, 1-3 ; 13, 3-4 : Florilegium Patristicum 11, Bonn 19112, pp. 81, 125, 129, 133 ; Clemens Alexandrinus, Stromata I, 19, 91. 94 : S. eh. 30, pp. 117 s. ; 119 s. ; Conc. Oecum. Vat. II, Decr. de activitate missionali Ecclesiæ Ad Gentes, 11 : AAS 58 (1966), p. 960 ; Const. dogm. de Ecclesia Lumen Gentium, 17 : AAS 57 (1965), p. 21.

sequuntur quorumque fides etiam ad Abraham refertur.<sup>68</sup>

Rebus sic a Concilio apertis, Ecclesia cunctique etiam Christiani potuerunt pleniorē assequi conscientiam mysterii Christi, « quod absconditum fuit a sæculis et generationibus »<sup>69</sup> in Deo, ut in tempore recluderetur: hoc est in Homine Iesu Christo, et ut continenter singulis ætatibus revelaretur. In Christo ac per Christum plene se ipsum Deus monstravit hominibus ad eosque modo stabili accessit; eodem vero tempore in Christo ac per Christum homo est consecutus plenam conscientiam suæ dignitatis et exaltationis, conscientiam pariter valoris, naturam transcendentis, humanitatis propriæ ac sensus existentiae suæ.

Oportet igitur nos omnes – quotquot Christi sumus sectatores – circa illum ipsum congregiamur et coniungamur. Hæc vero consociatio – variis in partibus vitæ, traditionis, structurarum ac disciplinarum apud singulas Ecclesias vel Communitates ecclesiales – perfici non potest sine assiduo opere, quod mutuam provehat cognitionem removeatque obices in via ad unitatem perfectam. Attamen iam nunc valemus, immo et debemus adipisci mundoque testificari coniunctionem nostram, dum Christi

---

<sup>68</sup> Cfr. Declaratio de Ecclesiæ habitudine ad Religiones non-Christianas Nostra Aetate, 3-4: AAS 58 (1966), pp. 741-743.

<sup>69</sup> Col 1, 26.

mysterium nuntiamus, divinam et humanam proprietatem Redemptionis commonstramus, indefatigabili cum perseverantia pugnamus pro illa dignitate, quam quisque homo assecutus est perpetuoque attingere valet in Christo. Quæ quidem est gratiæ ipsius adoptionis divinæ dignitas ac simul dignitas veritatis interioris humani generis, quæ – si omnino secundum communem mundi nostræ ætatis conscientiam adeptæ est tam primarium mornentum – magis etiam nobis patescit, illa veritate effulgente, quæ ipse est : Iesus Christus.

Etenim Iesus Christus stabile principium est sempiternumque velut centrum istius officii ac muneris, quod Deus ipse homini concedidit. Cuius muneris nos universi participes esse debemus, in illud præterea cunctas nostras dirigere vires, quoniam id nunc cum maxime necessarium est nostri temporis hominibus. Et si hoc opus nostra ætate impediri videtur maioribus repugnantis quam ullo alio tempore, talis rerum condicio probat idem officium hodie magis esse necessarium magisque ab hominibus quam antehac exspectari, quamvis ab iis oppugnetur. Hic igitur via obliqua mysterium illud oeconomiaë divinæ tangimus, quæ salutem et gratiam Cruci iunxit. Christus haud frustra dixit « Regnum cælorum vim patitur et violenti rapiunt illud »;<sup>70</sup> præterea addidit : « filii huius sæculi prudentiores

---

<sup>70</sup> Mt 11, 12.

filiis lucis in generatione sua sunt ». <sup>71</sup> Aequo animo subeamus hanc reprehensionem, ut esse possimus tamquam illi « violenti Dei », quos toties iam in Ecclesiæ historia conspeximus quosque his etiam temporibus reperimus, ut omnes conscii ac volentes constringamur uno illo nobili officio, nominatim : ostendendi mundo Christum, adiuvandi quemque hominem, ut in eo se ipse detegat, subveniendi temporis nostri hominibus, fratribus ac sororibus, populis ac nationibus cunctoque generi humano, Civitatibus adhuc ad progressum nitentibus et opulentis : brevi, omnibus, ut cognoscant « investigabiles divitias Christi », <sup>72</sup> quippe quæ omni homini præsto sint omnisque hominis bonum efficiant.

**12.** In hac communicatione muneris, de quo Christus imprimis decernit, omnes Christiani invenire debent ea, quæ ipsos iam coniungunt, etiam priusquam plena eorum communio ad effectum adducatur. Hæc unio est apostolica et missionaria, missionaria et apostolica. Ob eandem hanc unionem appropinquare possumus ad mirabile illud quasi patrimonium spiritus humani, quod in universis religionibus est manifestatum, uti docet Concilii Vaticani II Declaratio Nostra Aetate. <sup>73</sup> Propter eam accedimus quoque ad cunctas humani cultus formas, ad omnes

---

<sup>71</sup> Lc 16, 8.

<sup>72</sup> Eph 3, 8.

<sup>73</sup> Cfr. n. 1 s. : AAS 58 (1966), pp. 740 s.



ideologicas opiniones, ad singulos homines bonæ voluntatis. Advenimus autem cum observantia illa et æstimatione ac discernendi facultate, quæ iam inde ab Apostolorum temporibus designabat agendi rationem missionalem atque ipsius missionarii. Recordari satis est de Sancto Paulo eiusque, verbi causa, oratione habita Athenis in Areopago.<sup>74</sup> Missionalis animi habitus proficiscitur semper ex sensu permagnæ reverentiæ erga omne id, quod est « in homine », <sup>75</sup> et æstimationis eorum omnium, quæ ipse in pectoris sui penetralibus de altioribus gravioribusque quæstionibus iam excogitavit ; agitur tandem de observantia erga id omne, quod in illo operatus est Spiritus, qui « ubi vult spirat ». <sup>76</sup> Missionale munus nihil umquam delet, sed bona, quæ iam sunt, assumit et nova extruit, quamquam in ipso usu officia tam præcelsa non semper absolute sunt impleta. Atque conversio mentis, quæ ab eodem munere initiurn ducere debet, effectus est gratiæ, in qua – uti probe novimus – homo se ipsum plene reperiat oportet.

Hac de causa Ecclesia nostri temporis pondus maximum tribuit iis omnibus, quæ Concilium Vaticanum II proposuit sua in Declaratione de Libertate Religiosa, tum in prima

---

<sup>74</sup> Act 17, 22-31.

<sup>75</sup> Io 2, 25.

<sup>76</sup> Io 3, 8.

tum in secunda parte documenti.<sup>77</sup> Intimis sensibus percipimus, quantopere nos veritas ipsa obstringat, quam Deus nobis aperuerit. Advertimus nominatim in gens nostrum conscientiae officium circa illam veritatem ; cuius Ecclesia, ob Christi institutionem, custos est ac magistra, quoniam peculiari Spiritus Sancti praesidio munitur, ut fideliter valeat eandem veritatem custodire et docere secundum plenissimam illius integritatem.<sup>78</sup>

Implentes igitur hoc munus, respicimus Christum ipsum, qui primus est evangelizator,<sup>79</sup> eiusque observamus simul Apostolos, Martyres et Confessores. Declaratione de Libertate Religiosa ostendit nobis ac persuadet, quo pacto Christus deindeque Apostoli, veritatem nuntiantes, non ab hominibus allatam sed a Deo (« mea doctrina non est mea sed Eius qui misit me », <sup>80</sup> nempe Patris), omnique virtute mentis agentes, servaverint semper magnam observantiam erga hominem, erga ipsius intellectum et voluntatem, conscientiam et libertatem.<sup>81</sup> Hac ratione dignitas ipsa personae humanae velut pars quaedam efficitur eorum, quae illa nuntiatione continentur, etiam sine ullis verbis sed modo se gerendi erga

---

<sup>77</sup> Cfr. AAS 58 (1966), pp. 929-946.

<sup>78</sup> Cfr. Io 14, 26.

<sup>79</sup> Paulus PP. VI, Adh. Ap. Evangelii Nuntiandi, 6 : AAS 68 (1976), P. 9.

<sup>80</sup> Io 7, 16.

<sup>81</sup> Cfr. AAS 58 (1966), pp. 936 ss.

hominem. Hic animi habitus videtur respondere peculiaribus nostræ ætatis necessitatibus. Quandoquidem vera hominis libertas non in omnibus illis rebus reperitur, quas diversa systemata atque etiam singuli homines iudicant et prædicant uti libertatem, idcirco vel magis Ecclesia, propter divinam suam missionem, fit custos huius libertatis, quæ condicio est ac fundamentum veræ dignitatis personæ humanæ.

Iesus Christus homini in unaquaque ætate obviam procedit – proinde e etiam nostra – iisdem cum vocibus : « cognoscetis veritatem, et veritas liberabit vos ».<sup>82</sup> Hæc verba principalem in se necessitatem continent simulque admonitionem : necessitatem videlicet animi honesti erga veritatem uti condicionis veræ libertatis ; admonitionem pariter, ut declinetur quævis simulata tantum libertas, quælibet levis unice tantum parti favens libertas, omnis demum libertas, quæ totam per veritatem de homine ac mundo non permeet. Etiam hodie, duobus annorum milibus post, Christus nobis comparet tamquam ille, qui homini libertatem in veritate innixam affert, ille, qui hominem ab omnibus liberat, quæ istam libertatem coarctant, minuunt et quasi perfringunt ipsis in eius radicibus, nempe in hominis anima, corde, conscientia. Quam admirabiliter præterea hoc idem confirmant neque umquam confirmare desistunt ii, qui per

---

<sup>82</sup> Io 8. 32.

Christum et in Christo assecuti sunt veram libertatem eamque testificati, etiam cum exterius coercerentur !

Iesus Christus ipse, cum ante Pilati tribunal captivus consisteret ab eoque interrogaretur de accusationibus adversus se motis a Synedrii sodalibus, nonne respondit : « Ego in hoc natus sum et ad hoc veni in mundum, ut testimonium perhibeam veritati » ?<sup>83</sup> Illis itaque verbis coram iudice in maximo vitæ discrimine prolatis Christus quasi iteravit illam locutionem antea dictam « cognoscetis veritatem, et veritas liberabit vos ». Tot dein sæculis et ætatibus prolabantibus ab ipso Apostolorum tempore nonne Iesus Christus sæpissime apparuit iuxta homines ob veritatem iudicatos, nonne fortasse mortem subiit cum hominibus ob veritatem damnatis ? Num cessat ipse interpret esse semper et advocatus hominis, qui vivit « in Spiritu et veritate » ?<sup>84</sup> Profecto, sicut minime desinit talis esse coram Patre, ita talis permanet etiam quod ad historiam hominis pertinet. Et Ecclesia vicissim, quantumvis multæ infirmitates humanam eius historiam signent, non desistit illum sequi, qui fatus est : « venit hora, et nunc est, quando veri adoratores adorabunt Patrem in Spiritu et veritate ; nam et Pater tales quærit qui adorent eum. Spiritus est Deus, et eos

---

<sup>83</sup> Io 18, 37.

<sup>84</sup> Cfr. Io 4, 23.

qui adorant eum, in Spiritu et veritate oportet adorare ». <sup>85</sup>

### III

13. Cum, humanæ familiæ continenter ac quidem celerius crescentis experientia edocti, Christi introspicimus mysterium, clarius intellegimus quasi fundamentum harum viarum, in quibus, sapienter Pontifice Paulo VI monente, <sup>86</sup> opus est pergat nostræ ætatis Ecclesia, unam esse viam, per sæcula probatam et in posterum etiam valituram. Christus Dominus tum præsertim hanc indicavit viam, quando, ut Concilium docet, « Filius Dei, incarnatione sua cum omni homine quodammodo se univit ». <sup>87</sup> Ecclesia igitur potissimum esse suum ducit id efficere, ut continenter ad effectum hæc unitas adducatur et renovetur. Hoc unum etenim assequi cupit Ecclesia : ut a quolibet homine Christus inveniatur, ut idem Christus cum unoquoque vitæ iter conficiat, ea cum veritatis vi, hominem movente et mundum, quæ in mysterio inest Incarnationis et Redemptionis, atque cum illa amoris vi, quæ inde effulget. Inter processus, qui in rerum humanarum cursu continenter augescunt quique hac ætate in variis systematibus, ideologicis opinationibus de mundo publicisque

---

<sup>85</sup> Io 4, 23 s.

<sup>86</sup> Cfr. Litt. Enc. Ecclesiam Suam : AAS 56 (1964), pp. 609-659.

<sup>87</sup> Const. past. de Ecclesia in mundo huius temporis Gaudium et Spes, 22 : AAS 58 (1966), p. 1042.

Civitatum potestatibus prosperantur, Iesus Christus denuo quodammodo præsens adest, etsi toties abesse videtur, etsi Ecclesia multimodis coercetur, ne præsentia et actione, suæ institutioni propria, plene fruatur. Iesus Christus adest vi huius veritatis et amore, quæ in eo ad plenitudinem pervenerunt unicam neque iterabilem, quamvis vita eius terrena brevis esset atque etiam brevius publicum eius ministerium.

Præcipua Ecclesiæ via est Iesus Christus. Idem nostra est via « ad Patrem »<sup>88</sup> et est ad quemlibet hominem via. In hac autem via, quæ de Christo ducit ad hominem, in hac via, in qua Christus singulis hominibus iungitur, Ecclesia a nullo potest cohiberi. Hoc postulat bonum temporale hominis et bonum eius sempiternum. Christi eiusque mysterii causa, quo ipsa vita Ecclesiæ constat, iis omnibus Ecclesia neque moveri non potest, quæ vero hominis bono conducunt, neque eidem bono nocentia negligere. In variis suorum documentorum locis Concilium Vaticanum II affirmavit hanc primariam Ecclesiæ curam, « ut vita in mundo præcellenti dignitati hominis magis conformetur »<sup>89</sup> omni ex parte, et « humanior reddatur ».<sup>90</sup> Ipsius Christi, omnium hominum boni Pastoris, hæc est

---

<sup>88</sup> Cfr. Io 14. 1 ss.

<sup>89</sup> Const. past. de Ecclesia in mundo huius temporis *Gaudium et Spes*, 91 : AAS 58 (1966), p. 1113.

<sup>90</sup> Ibidem, 38 : l. c., p. 1056.

cura. Propter hanc sollicitudinem, ut in Constitutione pastorali Concilii legimus, « Ecclesia, quæ, ratione sui muneris et competentiæ, nullo modo cum communitate politica confunditur, neque ad ullum systema politicum alligatur, simul signum est et tutamentum transcendentiae humanæ personæ ».<sup>91</sup>

De homine ideo hic agitur, in tota eius veritate, in universa eius amplitudine. Non agitur de homine abstracto, sed vero, ut est, de homine concreto, historico, ut aiunt. De quolibet homine agitur, cum quivis comprehendatur mysterio Redemptionis, et huius mysterii gratia in omne tempus cum eo Christus se coniunxerit. Omnis homo in gremio materno conceptus in vitam venit, oriens e matre, et curæ Ecclesiæ, ipso Redemptionis mysterio, committitur. Quæ cura ad totum hominem spectat et modo prorsus peculiari ad eum refertur. Hæc cura in hominem intenditur, quatenus realis eius existentia, unica neque iterabilis, respicitur, in qua integra permanet imago et similitudo Dei ipsius.<sup>92</sup> Hoc ipsum Concilium significavit, cum, de hac similitudine tractans, monet « hominem... in terris solam creaturam esse quam Deus propter seipsam voluerit ».<sup>93</sup> Homo, quem Deus ita

---

<sup>91</sup> Ibidem, 76 : l. c. p. 1099.

<sup>92</sup> Cfr. Gen 1, 27.

<sup>93</sup> Const. past. de Ecclesia in mundo huius temporis Gaudium et Spes, 24 : AAS 58 (1966), p. 1045.

« voluit », quem ab æternitate « elegit », vocavit, ad gratiam et gloriam destinavit, ipse est « omnis » homo, homo quam maxime concretus, quam maxime realis ; hic enim est homo plenitudine mysterii ornatus, cuius in Iesu Christo est particeps effectus ; quod quidem mysterium singuli homines e quadragies milies centenis milibus huius terræ nostræ incolarum participant, ex quo sub corde matris concipiuntur.

**14.** Ecclesiæ non licet hominem deserere, cuius « sors », id est electio, vocatio, ortus et mors, salus aut damnatio nexu arctissimo et indissolubili cum Christo iunguntur. Hominem dicimus quemlibet huius orbis, huius terræ, quam primo homini Creator dedit, ad virum et mulierem dicens : « Subicite eam (terram) et dominamini » ;<sup>94</sup> hominem dicimus unumquemque, quatenus tota eius neque iterabilis realitas existentiae et actionis, intellectus et voluntatis, conscientiae et cordis consideratur. Homo pro singulari sua realitate (nam est « persona ») suas vitae vices habet et praesertim animae suae historiam. Homo, ut spiritum capax est et tot tamque diversis corporis vitaeque temporalis necessitatibus obnoxius, hanc suam ipsius quasi historiam conscribit, se cum aliis hominibus iungendo pluribus vinculis, consuetudinibus, rerum condicionibus, socialibus compagibus : idque facit ex quo primum in terra incipit esse, ex

---

<sup>94</sup> Gen 1, 28.



quo scilicet concipitur et nascitur. Homo totus in plena veritate existentiae suae, eius, quod est ut persona, et vitae suae communitariae et socialis – nempe intra familiam suam, societatem et in tam dissimilibus condicionibus, necnon intra nationem suam vel populum (et fortasse solum intra peculiarem nexum familiarum vel tribum), intra universum genus humanum – hic ipse homo est prima veluti via, quam Ecclesia in suo munere implendo emetiatur oportet, ille est prima et praecipua Ecclesiae via, quam ipse Christus aperuit, quaeque per mysterium Incarnationis et Redemptionis constanter transit.

Hic ipse homo, in tota veritate vitae suae, cum conscientia sua, cum continua sua ad peccatum proclivitate, simulque cum continua sua appetitione veritatis, boni, pulchri, iustitiae, amoris obversabatur Concilio Vaticano II, cum eiusdem hominis condicionem in mundo huius temporis describens, ex externis huius condicionis, rebus et causis eruebat immanentem humani generis veritatem : « In ipso enim homine plura elementa sibi invicem oppugnant. Dum enim una ex parte, utpote creatura, multipliciter sese limitatum experitur, ex altera vero in desideriis suis illimitatum et ad superiorem vitam vocatum se sentit. Multis sollicitudinibus attractus, iugiter inter eas e seligere et quibusdam renuntiare cogitur. Immo, infirmus ac n peccator, non raro illud quod non vult facit et illud quod r facere

vellet non facit. Unde in seipso divisionem patitur, ex ff qua etiarn tot ac tantæ discordiæ in societate oriuntur ».<sup>95</sup>

Hic ipse homo est via Ecclesiæ, in qua quodam modo omnes q illæ viæ nituntur, quæ Ecclesiæ sunt persequendæ, quia homo – omnis homo, nullo excepto – a Christo redemptus est ; quia cum homine – cum omni homine, nullo excepto – Christus aliquo modo iunctus est, licet homo huiusce rei non sit conscius : « Christus, pro omnibus mortuus est et resuscitatus, homini – cuilibet homini et omnibus hominibus – lucem et vires præbet... ut ille summæ suæ vocationi respondere possit ».<sup>96</sup>

Cum ergo hic homo sit via Ecclesiæ, eius cotidianæ vitæ et experientiæ, eius missionis et laboris via, necesse est Ecclesia nostræ ætatis semper renovetur, memor condicionis, in qua ille versetur ; cognitas scilicet habeat eius facultates, quæ, ut novo semper cursu diriguntur, ita ostenduntur. Oportet item Ecclesia pericula animadvertat homini impendentia. Noscere pariter debet ea omnia, quæ obsistunt, ne « vita hominis in dies humanior reddatur », <sup>97</sup> neve omnia, ex quibus hæc vita constat, veræ hominis

---

<sup>95</sup> Const. past. de Ecclesia in mundo huius temporis Gaudium et Spes, 10 : AAS 58 (1966), p. 1032.

<sup>96</sup> Ibidem, 10 : l. c., p. 1033.

<sup>97</sup> Ibidem, 38 : l. c., p. 1056 ; Paulus PP. VI, Litt. Enc. Populorum Progressio, 21 : AAS 59 (1967), p. 267s.

dignitati conformentur. Paucis : omnia sciat illi cursui repugnantia.

**15.** Descriptionem igitur, cuius apud nos viget memoria, quamque tam acute et graviter Concilium Vaticanum II effinxit, adhuc « signis temporum » aptandam curabimus itemque rerum adiunctis, quæ perpetuo mutantur et in certos et definitos abeunt cursus.

Nostræ ætatis homo semper urgeri videtur iis ipsis rebus, quas efficit, nempe proventu operis manuum suarum et magis etiam laboris mentis et voluntatis propensionum. Fructus huius multiformis industriæ humanæ obnoxii sunt – nimis celeriter quidem ac sæpe tali modo, qui prævideri non possit – alienationi », quatenus illis, qui eos protulerunt, simpliciter auferuntur : hoc non solum fieri contingit nec tanta ratione, quanta, saltem ex parte, in quodam ambitu ex eorum effectibus consequenter et oblique enato, iidem fructus contra hominem ipsum convertuntur. Hæc videtur esse summa acerbissimæ condicionis existentiae hominum nostri temporis, prout maxima et universali amplitudine patet. Quare homo maiore in dies afficitur timore. Metuit enim, ne fructus sui – non omnes quidem neque plerique – sed nonnulli et ii sane, qui singularem partem habent ingenii eius et industriæ, contra se ipsum omnino convertantur ; metuit, ne fiant instrumenta et arma incredibili apta modo ad se ipsum destruendum ; in

comparatione cuius rei aversiones et calamitates, quas ex historia novimus, quasi evanescere videntur. Hinc quærendum est : quibus de causis hæc facultas, ab initio homini data, qua terram subiceret,<sup>98</sup> contra ipsum hominem vertitur, excitans, ut facile intellegitur, angorem, conscium aut inscium pavorem, minarum sensum, vario modo totam familiam humanam huius temporis afficientem variisque rationibus manifestum ?

Hæc minax condicio, quam contra hominem eius opera ipsa concitant, ad diversa contendit ac diversi est ponderis. Magis ac magis animadvertere videmur usum terræ huius, in qua vivimus, huius orbis, præstitutam bonorum dispensationem postulare honestam et rationi consentaneam. Præterea idem terræ usus, spectans non tantum ad quæstuosas industrias, sed etiam ad rei militaris augendæ contentionem, atque technicæ disciplinæ progressio, quæ non temperetur neque intra complexum universalis vereque humanisticæ rationis ordinetur, ambitum naturalem hominis sæpe in discrimen adducunt, eum a consuetudine naturæ abalienant et ab eadem avertunt. Huius ambitus naturalis sæpe videtur homo non alias significationes percipere quam eas, quæ proximo usui et rerum consumptioni inserviunt ; cum, contra, Creator constituerit, ut homo cum natura communicaret, veluti « dominus » et « custos » intellegens et

---

<sup>98</sup> Cfr. Gen 1, 28.

nobilis, non autem ut is, qui omnia quæstui haberet et, nullo respectu habito, destrueret.

Technicarum artium progressus atque humani cultus processus nostræ ætatis, technicæ disciplinæ veluti principatu distinctus, postulant congruentem vitæ moralis ac disciplinæ ethicæ progressionem; quæ quidem progressio, pro dolor, semper inferior esse videtur. Idcirco prædictus progressus, quamvis mirabilis sit facileque declaret etiam vera humanæ magnitudinis vestigia, quæ in Libro Genesis iam in descriptione creationis,<sup>99</sup> saltem ut fecunda semina, narrantur, nequit multiplices anxitudines non excitare. Quarum prima rem maximam et essentialem tangit: huiusmodi enim progressus, cuius est homo auctor et fautor, redditne vitam hominis in terra omni ex parte « humaniorem? »; « homine digniorem? »? Non est dubium, quin eam talem variis modis reddat. Hac tamen urgemur interrogatione, quatenus ad rem primariam pertinet: an homo, ut homo, in hoc progressus faciendi complexu vere melior fiat, nempe spiritualiter maturior, dignitatis suæ humanitatis magis conscius, officii conscientiæ congruentior, ad ceteros propensior, ad eos maxime, qui necessitate et infirmitate premuntur, paratior omnibus auxilium dare atque præbere. Cum per Christum idonei facti sint, qui quæstionem ad hominem pertinentem modo tam

---

<sup>99</sup> Cfr. Gen 1-2.

universali persentirent, Christiani hanc interrogationem ponant oportet; idemque quærere debent omnes homines, præsertim qui ex iis ordinibus socialibus sunt, qui ad nostræ ætatis progressus actuose operam conferunt. Nobis, processus istos considerantibus in iisdemque versantibus, neque immodico fervore excitari licet, neque quadam admiratione efferri tantum ad magna spectante, quæ assecuti sumus; sed omnibus, maxima cum probitate, obiectiva ratione et morali officii conscientia, interrogationes essentielles sunt ponendæ, quæ ad condicionem hominis hodie et in futurum attinent. Congruuntne omnia humani ingenii inventa, hactenus parta, et ea, quæ technicæ disciplinæ periti in futurum tenipus meditantur, cum morali et spirituali hominis profectu? Crescitne, proficitne homo, ut homo, in hoc rerum statu aut recedit et suam deicit humanitatem? In hominibus, «in complexu cuiusque hominis», quo bonum malumque morale continentur, præstatne bonum malo? Augentur in hominibus, inter homines, amor erga genus humanum, iurium aliorum observantia – cuiuslibet hominis, gentis, populi – an, contra, increscunt immoderatus et multiplex amor sui, nimia suæ gentis studia, – non autem vera patriæ caritas – atque etiam cupido ceteris dominandi, propria iura et merita egrediendo, itemque voluntas fruendi toto incremento bonorum

materialium atque proventibus rerum technicarum eo tanto consilio, ut vel ceteris imperetur vel faveatur variis libidinibus populos subiugandi ?

Hæ profecto sunt interrogationes essentielles, quas Ecclesia non potest non ponere, cum eas amplius decies milies centena milia hominum nunc in orbe terrarum viventium modo plus minus expresso ponant. De argumento auctus et profectus omnes loquuntur et cunctæ ephemerides et scripta typis edita, omnibus fere huius ætatis sermonibus vulgata, tractant. In hoc tamen argumento – id est præ oculis habendum – non tantum asseverata et certa insunt, sed etiam quæsitæ quædam et sollicitudines animum exagitant, quæ non minoris momenti sunt quam illa asseverata et certa. Hæ enim indoli humanæ cognitionis consentaneæ sunt, quin immo maximæ necessitati fundamentali curæ, qua homo pro homine sollicitatur, pro sua ipsius humanitate, pro futura hominum sorte in terra respondent. Ecclesia, quæ fide eschatologica movetur, hanc suam curam pro homine eiusque humanitate, pro futura hominum sorte in terra, et ideo pro cursu etiam totius processus et profectus, existimat suo muneri et necessariam esse et indissolubili nexu cum eo coniunctam. Cuius quidem curæ principium ea in ipso Iesu Christo, ut Evangelia testantur, invenit et hanc ob rem eandem cupit continenter

amplificare in Christo, nova ratione ponderando condicionem hominis iuxta præcipua nostri temporis signa.

**16.** Si igitur tempus nostrum, scilicet nostræ generationis tempus, quod fini alterius millennii iam appropinquat, progressu nobis splendidum videtur, plenum tamen simul apparet homini multifariam impendentium periculorum, de quibus Ecclesiæ cum omnibus hominibus bonæ voluntatis et loquendum est et assidue disserendum. Absona enim hominis huius temporis conditio videtur ab iis, quæ ipse ordo moralis obiective postulat, quæ iustitia et præsertim humani generis amor socialis flagitant. Quæ omnia nihil aliud sonant, quam quod Creator primo nuntio homini dato edixit, cum ei terram traderet subiciendam.<sup>100</sup> Hunc primum nuntium Christus Dominus confirmavit in mysterio Redemptionis. Concilium Vaticanum II id expressit pulcherrimis iis doctrinæ capitibus, quæ ad « regiam hominis dignitatem » spectant, ad eius nempe vocationem ad communicandum cum Christo « munus regale ».<sup>101</sup> Quid autem proprie significant illud « regale munus illudque « dominium » hominis in mundum visibilem,

---

<sup>100</sup> Gen 1, 28 ; cfr. Conc. Oecum. Vat. II, Decr. de instrumentis communicationis socialis Inter Mirifica, 6 : AAS 50 (1964), p. 147 ; Const. past. de Ecclesia in mundo huius temporis Gaudium et Spes, 74, 78 : AAS 58 (1966), pp. 1095 s. ; 1101 a.

<sup>101</sup> Cfr. Const. dogm. de Ecclesia Lumen Gentium, 10 ; 36 : AAS 57 (1965), pp. 14 s. ; 41 s.



hominì ab ipso Creatore ut munus tributum, nisi ethicam antecellere rei technicæ, personam rebus præstare, spiritum materiæ antecedere ?

Quare hodierni progressus gradus omnes inspectandi sunt : nempe ratione habita eorum, quæ supra diximus, eiusdem progressus singula momenta radiographicis imaginibus – ut ita dicamus – sunt imprimenda. De personis enim promovendis agitur, non tantummodo de rebus multiplicandis, quibus personæ uti possint. Id agitur – quemadmodum quidam temporis nostri philosophus dixit et ut Concilium affirmavit – : non tam ut quis « plus habeat » quam ut « plus sit ».<sup>102</sup> Etenim iam verum est et animadvertitur periculum, ne homo, dum eius dominium in res oeconomicæ auget, ipse eiusdem domini rationes primarias amittat, variis modis eius humanitas illis rebus subiciatur atque ipse – quamvis id non statim intellegat – multimodis circumveniatur ac quidem per totam vitæ communitariæ dispositionem organicam, per proventus fructusque faciendi systema, per vim instrumentorum communicationis socialis. Non licet homini neque se ipsum neque suum in hoc mundo aspectabili locum veluti abdicare ; non licet ei rerum servum esse, oeconomicorum systematum servum, propriorum fructuum

---

<sup>102</sup> Cfr. Const. past. de Ecclesia in mundo huius temporis Gaudium et Spes, 35 : AAS 58 (1966), p. 1053 ; Paulus PP. VI, Allocutio ad Viros e Legatorum Coetu, 7 Ian. 1965 : AAS 57 (1965), p. 232 ; Litt. Encycl. Populorum Progressio, 14 : AAS 59 (1967), p. 264.

servum. Ille humanus cultus, qui omnia in materia posita esse ducit, in huius generis servitutem hominem redigit, etsi id eius rei fautoribus interdum vel insciis vel nolentibus fieri contingit. Hæc profecto est causa, cur nunc de homine angamur. Non tantum etenim refert modo abstracto respondere ad interrogationem, quis sit homo, sed agitur de toto dinamico vigore vitæ cultusque civilis. Agitur de variis in ceptis vitæ cotidianæ et simul de suscipiendis rationibus, quibus multa disponantur pertinentia ad cultum civilem inducendum, ad res politicas, oeconomicas, sociales, Civitatis proprias multasque alias.

Ideo autem condiciones hominis nostri temporis dicimus aberrare ab obiectivis disciplinæ moralis et iustitiæ postulatis et magis etiam ab amore sociali, quia facta et comparationes notissimæ id confirmant, de quibus sæpe in enuntiationibus Pontificum, Concilii, Synodorum tractatur.<sup>103</sup> Condicio hominis huius temporis sine

---

<sup>103</sup> Cfr. Plus PP. XII, Nuntius radiophonicus, quinquagesimo exacto anno a Litteris Encyclicis « Rerum Novarum » a Leone PP. XIII datis (1 Jun. 1941) : AAS 33 (1941), pp. 195-205 ; Nuntius radiophonicus in pervigilio Nativitatis D. N. Iesu Christi universo orbi datus (24 Dec. 1941) : AAS 34 (1942), PP. 10-21 ; Nuntius radiophonicus in pervigilio Nativitatis D. N. Iesu Christi universo orbi datus (24 Dec. 1942) : AAS 35 (1943),- pp. 9-24 ; Nuntius radiophonicus in pervigilio Nativitatis D. N. Iesu Christi universo orbi datus (24 Dec. 1943) : AAS 36 (1944), pp. 11-24 ; Nuntius radiophonicus in pervigilio Nativitatis D. N. Iesu Christi universo orbi datus (24 Dec. 1944) : AAS 37 (1945), pp. 10-23 ; Sermo, astantibus PP. Cardinalibus, habitus (24 Dec. 1945) : AAS 38 (1946), pp. 15-25 ; Allocutio, astantibus PP. Cardinalibus, habita (24 Dec. 1946) : AAS 39 (1947), pp. 7-17 ; Nuntius radiophonicus in pervigilio Nativitatis D. N.

dubio non unius generis est, sed multimodis differt. Hæ differentiæ historicis quidem causis evenerunt, sed etiam in doctrinam ethicam valde redundant. Probe enim novimus, quo loco sit cultus ille rerum utendarum, qui consistit in nimia copia bonorum homini vel totis societatibus necessariorum – quæ scilicet divitiis affluunt suntque valde progressæ – dum reliquæ societates, saltem magnæ earum partes, fame laborant nec pauci cotidie ob inediam et tenuitatem victus moriuntur. Inest etiam pariter in nonnullis pravus quidam libertatis usus, proprius incontinentiæ in rebus utendis, legi ethicæ non

---

Iesu Christi universo orbi datus (24 Dec. 1947) : AAS 40 (1948), pp. 8-16 ; Ioannes PP. XXIII, Litt. Enc. Mater et Magistra : AAS 53 (1961), pp. 401-464 ; Litt. Enc. Pacem in terris : AAS 55 (1963), pp. 257-304 ; Paulus PP. VI, Litt. Enc. Ecclesiam Suam : AAS 56 (1964), pp. 609-659 ; Allocutio in Consilio Nationum Unitarum habita (4 Oct. 1965) : AAS 57 (1965), pp. 877-885 ; Litt. Enc. Populorum Progressio : AAS 59 (1967), pp. 257-299 ; Allocutio ad Columbianos agricultores v. d. « campesinos » habita (23 Aug. 1968) : AAS 60 (1968), pp. 619-623 ; Allocutio ad Præsules ex Amerieue Latinæ regionibus habita (24 Aug. 1968) : AAS 60 (1968), pp. 639-649 ; Allocutio Romæ habita ad Consilium v. d. « Food and Agriculture Organization » (F.A.O.) (16 Nov. 1970) : AAS 62 (1970), pp. 830-814 ; Ep. Apost. Octogesima Adveniens : AAS 63 (1971), pp. 401-441 ; Allocutio ad Sacri Collegii Patres habita (23 Iun. 1972) : AAS 64 (1972), pp. 496-505 ; Ioannes Paulus PP. II, Allocutio ad III Coetum Generalem Episcoporum Americæ Latinæ (28 Ian. 1979) : AAS 71 (1979), pp. 187 ss. ; Allocutio ad « Indios », quos vulgari lingua appellant, in pago Cuilapan prole urbem Oaxacam (29 Ian. 1979) : loc. cit., pp. 207 ss. ; Allocutio ad operarios in urbe Guadalaiara habita (30 Ian. 1979) : loc. cit., pp. 221 ss. ; Allocutio ad operarios in urbe Monterreyensi habita (31 Ian. 1979) loc. cit., pp. 240 ss. ; Conc. Oecum. Vat. II, Declaratio de libertate religiosa Dignitatis Humanae : AAS 58 (1966), pp. 929-941 ; Const. past. de Ecclesia in mundo huius temporis Gaudium et Spes : AAS 58 (1966), pp. 1025-1115 ; Documenta Synodi Episcoporum, De iustitia in mando : AAS 63 (1971), pp. 923-941.

obnoxia; quo simul aliorum libertas coarctatur; eorum videlicet, qui, gravi laborantes penuria rerum, ad maiorem miseriam et indigentiam perducuntur. Hæc comparatio, omnibus nota, et hæc discrepantia, de qua mentionem fecerunt in documentis magisterii sui Pontifices nostri huius sæculi, recentius autem Ioannes XXIII et Paulus VI,<sup>104</sup> in immensum ampliant imaginem parabolæ biblicæ de divite epulone et de paupere Lazaro.<sup>105</sup>

Huius rei magnitudo in quæstionem deducit compaginis formas ipsas rationesque nummarias et pecuniarias, effectrices et mercatorias, quæ diversis impulsibus politicis suffultæ regunt totius orbis oeconomiam. Hæ enim pæne non valent neque extinguere iniustas societatis condiciones, ex præterito t empore transmissas, neque occurrere instantibus postulatis ac necessitatibus moralibus præsentis ætatis. Dum nempe hominem subiciunt oneribus a semet generatis, dum celerius usque absumunt opes ac vires terræ, dum circumiacentia naturæ loca in discrimen adducunt, eadem illæ quidem structuræ faciunt, ut sine intermissione propagentur miseriam regiones simulque ut dilatentur angores et spes inanes et acerbitates.<sup>106</sup>

---

<sup>104</sup> Cfr. Ioannes PP. XXIII, Litt. Enc. Mater et Magistra : AAS 53 (1961), pp. 418ss. ; Litt. Enc. Pacem in terris : AAS 55 (1963), pp. 289 ss. ; Paulus PP. VI, Litt. Enc. Populorum Progressio : AAS 59 (1967), pp. 257-299.

<sup>105</sup> Cfr. Lc 16, 19-31.

<sup>106</sup> Ioannes Paulus PP. II, Homilia habita Dominicopoli (25 Ian. 1979) n. 3 : AAS. 71 (1979), pp. 157 ss. ; Allocutio habita ad « Indios », quos v. d.,

Consistimus videlicet hic coram horrida quadam condicione, quæ neminem indifferentis esse animi patitur : nam ille, qui ex altera parte studet percipere maximum lucrum et ille, qui ex altera solvit pretium damnorum et iniuriarum, semper homo est. Conditio autem ista magis etiam aggravatur, quod in eadem vicinitate inveniuntur sociales ordines privilegiis commoditatibusque fruentes necnon valde opulentæ ac progressæ nationes, quæ nimium cumulant bona quarumque divitiæ sæpius immodicæ fiunt occasiones variorum malorum. Illuc dein accedunt æstus quidam pretiorum usque excandescentium et ægritudo hominum opere carentium : alia ecce indicia huius turbationis morales, quæ in totius orbis statu deprehenditur quæque flagitat audacia et efficacia proinde consilia cum vera hominis dignitate congruentia.<sup>107</sup>

Attamen minime excedit hominum potestatem istud officium. Illud principium solidaritatis, quod dicitur, lato sensu suo, provehere debet efficientem præparationem ipsarum institutionum rationumque idonearum – sive agitur de pecuniarum permutationibus, ubi necesse est res temperentur normis sanæ alicuius

---

probe urbem Oaxæam (30 Ian. 1979) n. 2 : loc. cit., pp. 207ss. ; Allocutio ad operarios in urbe Monterreyensi habita (31 Ian. 1979), n. 4 : loc. cit., p. 241 s.

<sup>107</sup> Cfr. Paulus PP. VI, Ep. Apost. Octogesima Adveniens, n. 42 : AAS 63 (1971), p. 431.

æmulationis, sive agitur de latiore directioreque partitione divitiarum et harum moderatione – ut videlicet populi ad prosperitatem oeconomicam contententes non solum valeant primis suis necessitatibus satisfacere sed etiam certe paulatimque progredi.

In hac vero difficili via – id est in via pernecessariæ mutationis structurarum ipsius oeconomicæ vitæ – ægre nimirum procedetur, nisi intervenerit vera mentis, voluntatis, cordis conversio. Quod quidem poscit deliberatam operam hominum populorumque liberorum et inter se iunctorum. Nimis sæpe confunditur libertas cum naturali curatione utilitatis singularis aut communis, immo etiam cum naturali proclivitate ad pugnandum et dominandum, quibuscumque doctrinarum coloribus tinguntur illæ cupiditates. Constat sane hos existere impulsus ac premere ; atqui fieri non poterit, ut aliqua constituatur oeconomia vere humana, nisi hi suscipiuntur et diriguntur et restringuntur superioribus rationibus, quæ in homine latent, ac principiis, quæ germanam populorum humanitatem statuunt. Ex his omnino fontibus profluere debent conamina, per quæ libertas hominis vera significabitur quæque vicissim eandem libertatem etiam in provincia oeconomiae præstabit et tutabitur. Incrementum oeconomicum, una cum omnibus iis rebus, quæ aptum eius modum agendi efficiunt, constanter

disponi et impleri oportet intra prospectum plenæ alicuius solidæque progressionis singulorum hominum ac populorum, sicut vehementer admonuit Decessor Noster Paulus VI suis in Litteris Encyclicis Populorum Progressio inscriptis. Nam aliter solus ille ordo « progressuum oeconomicorum » ita prævalebit, ut vitæ humanæ summam denique submittat uni tantum parti, id est minoribus suis necessitatibus, ut hominem obruat, societates dissolvat ac demum propriis difficultatibus vitiisque implicetur.

Accipi tamen potest hoc officium, perinde ac fatta quædam certa et eventa testantur, quæ longum est. subtilius hic recensere. Sed illud patet certum : infra latissimam hanc regionem necesse est substrui et stabiliri et alte defigi sensum officiorum moralium, quem induere sibi debet quisque homo. Iterum ecce semperque homo ipse est. Nobis Christianis officii conscientia circa hæc potissimum patet, si mente complectimur – semper autem complecti debemus – extremi iudicii imaginem, secundum verba Christi, quæ Matthæi Evangelium refert.<sup>108</sup>

Oportet hoc eschatologicum spectaculum semper « applicetur » ad historiam hominis et fiat iugiter humanorum actuum « mensura », veluti singulis et omnibus necessaria sui recognitionis forma : « Esurivi enim, et non dedistis mihi

---

<sup>108</sup> Cfr. Mt 25, 31-46.

manducare... nudus eram, et non cooperuistis me... in carcere (eram), et non visitastis me ».<sup>109</sup> Quæ verba maiorem vim hortatoriam accipiunt, cum videmus potius quam panem et auxilia humani cultus novis Civitatibus et nationibus, ad libertatem quodammodo expergiscentibus, nova arma, interdum copiose, præberi, necnon instrumenta ad destruendum apta, quæ proeliis armatorum et bellis inserviunt, nec tantum legitimis iuribus et liberæ summæque rerum potestati defendendis destinantur quantum suæ cuiusque patriæ amorem immodicum, nimiam imperandi cupiditatem, novam quandam varii generis coloniarum dicionem ostendunt. Orbis terrarum regiones, fame et miseria laborantes, brevi fertiles reddi potuissent – ut bene novimus omnes – si ingentes pecuniarum collocationes pro armis comparandis, quæ bellis et eversionibus destinantur, in collocationes mutatæ essent pro alimento, scilicet vitæ servientes.

Fortasse hæc consideratio ex aliqua parte abstracta manebit, fortasse utrique « parti », suarum culparum immemori, materiam præbebit incusationis mutuæ ; fortasse etiam novarum obiurgationum contra Ecclesiam causa erit ; cui quidem nihilominus, cum alia arma non habeat nisi arma spiritus, verbi et amoris, non licet « verbum opportune, importune »<sup>110</sup>, no non

---

<sup>109</sup> Mt 25, 42. 43. 39.

<sup>110</sup> 2 Tim 4, 2. 40 s.



nuntiare. Quam ob rem obsecrare non desinit utramque partem et omnes simul rogare, Dei et hominis nomine : « ne occideritis ! Ne hominibus ruinas et strages paraveritis ! Fratribus vestris, fame et miseria excruciatas, prospicite ! Uniuscuiusque dignitatem et libertatem observate ! ».

17. Sæculum nostrum hactenus magnas intulit homini calamitates ac vastationes non solum materiales sed etiam morales, immo præsertim morales. Non facile profecto, ad hæc quod attinet, ætates et sæcula comparari possunt, cum id iudiciis historicis, quæ mutantur, subiciatur. Attamen, etsi huiusmodi comparationes non adhibentur, confitendum est tale hoc sæculum fuisse, ut sibi homines multas iniustitias et cruciatus parerent. Estne hic rerum cursus strenue cohibitus ? Attamen non commemorare non possumus, egregia cum existinatione et cum spe temporis futuri, quo præclaro nisu conditum sit Consilium Nationum Unitarum ad definienda et statuenda obiectiva et inviolabilia hominis iura, eiusdem Consilii Civitatibus consociatis invicem spondentibus ea iura accurate se esse servaturas. Quod susceptum onus et officium ratum habuerunt omnes fere nostri temporis Civitates ; indeque auctoritas et spes manant fore, ut hominis iura toto orbe terrarum fiant principium fundamentale, ex quo opus ad bonum hominis dirigatur. Non est cur Ecclesia affirmet quam

arcte hæc quæstio cum actione sua in mundo huius temporis conectatur. In ipsa enim quæstione fundatur pax socialis et internationalis, ut Ioannes XXIII, Concilium Vaticanum II et postea Paulus VI in peculiaribus documentis edixerunt. Ad summam, pax consistit in iuribus inviolabilibus hominis colendis – « opus iustitiæ pax » – dum, contra, ex horum iurium violatione oritur bellum, etiam graviores eorum iurium afferens violationes. Iura autem hominis in pace violari acerbissimum est et, quantum ad progressum pertinet, quædam est incredibilis hominis pugna contra hominem, adversans omni agendi consilio, quod se ipsum humanisticum profiteatur. Quod vero initum consilium sociale, oeconomicum, politicum et ad humanum cultum pertinens patitur sic non definiri? Persuasissimum Nobis est nullum hodie esse in mundo consilium eiusmodi, in quo, etsi contrariæ sint ideologiæ circa rationes de rebus humanis statuendi, homo non semper primum locum obtineat.

Quodsi, licet hæc præposita seu præmissa sint, videmus multimodis iura hominis violari, si publicæ custodiæ campos reapse quasi testes contuemur, violentiam, tormenta, terrorem et multa eaque iniqua discrimina fieri videmus, hoc originem ducit ex aliis causis seu, uti aiunt præmissis, quæ minuunt vel sæpe fere delent efficientiam præmissarum humanisticarum, quæ

agendi consiliis et systematibus huius temporis continentur. Oportet igitur eiusmodi consilia continenter recognoscantur, quod attinet ad obiectiva et inviolabilia hominis iura.

Horum iurium declaratio perinde ac Consilii Nationum Unitarum institutio sine dubio non tantum eo pertinebant, ut infanda facinora postremo bello universali patrata amoverentur, sed etiam ut quasi fundamentum iaceretur idoneum ad agendi consilia, systemata, Civitatum regendarum formas continenter recognoscenda ; quod quidem hac una et fundamentali ratione faciendum esset, quæ bonum hominis – seu personæ in communitate – dicitur et quæ, quasi elementum primum boni communis, esse debet præcipuum criterium omnium agendi consiliorum, systematum, regiminum.

Quod nisi fiat, vita humana, etiam cum pax viget, variis cruciatibus est obnoxia, quibuscumque ingravescunt simul multiplices formæ dominationis, tyrannici imperii, novæ colonicæ ditionis, effrenatæ populos subigendi voluntatis ; quibus ipse nationum convictus in discrimen adducitur. Re quidem vera significanter constat et pluries rerum gestarum memoriis confirmatur violationem iurium hominis seiungi non posse a violatione iurium nationis, quacum homo vinculis organicis, quasi cum ampliore familia, coniungatur.

Iam a priore parte huius sæculi, crescentibus tyrannicis absolutisque imperiis, unde, ut notum est, immanis belli calamitas est exorta, Ecclesia significaverat, quid de huiusmodi tyrannicis dominationibus sentiret, quæ specie maius bonum, quod Civitatis est bonum, appetebant, dum, teste historia, nonnisi de bono agebatur certarum quarundam factionum, quæ se idem esse ac Civitates ipsas contendebant.<sup>111</sup> Re vera illæ dominationes iura civium coarctaverant, agnitione eorum inviolabilium hominis iurium denegata, quæ dimidio fere hoc sæculo in Consilii internationalis sede sunt affirmata. Dum de hoc progressu lætitiā participat cum omnibus hominibus bonæ voluntatis, cum omnibus hominibus iustitiæ et pacis vere studiosis, Ecclesia, sciens « litteram » solam « occidere posse », « spiritum autem vivificare »,<sup>112</sup> una cum his hominibus bonæ voluntatis continenter exquirat oportet, utrum declaratio iurium hominis et eorum « litteræ » probatio idem valeant ubique terrarum ac « spiritus » eorundem impletio. Non sine causa enim timendum est, ne persæpe multum absit, ut hoc perficiatur et ne interdum vitæ publicæ et socialis « spiritus » acerbe

---

<sup>111</sup> Pius PP. XI, Litt. Enc. Quadragesimo anno : AAS 28 (1931), p. 213 ; Litt. Enc. Non abbiamo bisogno : AAS 23 (1931), pp. 235-312 ; Litt. Enc. Divini Redemptoris : AAS 29 (1937), pp. 65-106, Ep. Enc. Mit brennender Sorge : AAS 29 (1937), pp. 145-167 ; Pius PP. XII, Litt. Enc. Summi Pontificatus : AAS 31 (1939), pp. 413-453.

<sup>112</sup> Cfr. 2 Cor 3, 6. 42.

discrepet a « littera », de iuribus hominis affirmata. Qui ad eiusmodi condicionem inducendam conferunt operam, suis ipsórum societatibus gravem, peculiare onus suscipiunt, quod attinet ad eas ipsas societates hominisque historiam.

Essentialis notio Civitatis, quatenus est communitas politica, in hoc posita est, ut societas, et, qui illam efficit, nempe populus, sit veluti dominus et faber suæ fortunæ. Huius generis Civitatis significatio ad effectum non deducitur, si loco exercitationis potestatis, quam societas vel populus moraliter participet, huius societatis ceteros cives a quibusdam in dicionem potestatemque redigi videmus. Sunt hæc nostra ætate maximi momenti, qua potissimum aucta est conscientia socialis hominum simulque desiderium civium in vita politica communitatis partem habendi, ratione habita verarum cuiusque populi condicionum acque necessarij vigoris publicarum auctoritatum.<sup>113</sup> Hæ igitur, quæ attinent ad progressum hominis et ad universum profectum humanitatis eius, summæ quæstiones sunt.

Ecclesia semper docuit pro bono communi esse agendum, hoc modo bonos cives instituens pro singulis Civitatibus ; ea præterea semper monuit publicarum potestatum præcipuum

---

<sup>113</sup> Cfr. Conc. Oecum. Vat. II, Const. past. de Ecclesia in mundo huius temporis Gaudium et Spes, 31 : AAS 58 (1966), pp. 1050.

officium esse sollicitudinem de bono communi societatis et inde iura earum fundamentalia oriri. Propter ea, quæ ut præmissas proposuimus quæque ad ordinem ethicum obiectivum attinent, iura publicæ potestatis nequeunt intellegi nisi ratione habita naturalium et inviolabilium hominis iurium. Bonum illud commune, cui publicæ auctoritates Civitatis serviunt, plene efficitur tantummodo, cum cives de suis iuribus sunt securi. Nisi hoc fiat, dissolvitur societas, cives summis potestatibus adversantur vel vexationis, minarum, violentiæ, terroris condiciones nascuntur, quarum multa exempla præbuerunt effrena absolutaque nostri sæculi imperiti. Inde fit, ut principium iurium hominis penitus contingat materiam iustitiæ socialis, ac ratio fiat, qua exploretur, num ea vere serventur in vita institutorum politicorum.

Merito in his iuribus libertatis religiosæ et libertatis conscientiæ iura annumerantur. Concilium Vaticanum II perneceesse esse æstimavit ampliorem hac de re enuntiationem elaborare. Id fecit documento, cui titulus est Dignitatis humanæ,<sup>114</sup> et in quo ea quæstio non tantum ex theologica ratione, sed etiam ex iure naturali est pertractata, scilicet « simpliciter humanæ », secundum illas præmissas, ex ipsa hominis experientia, ex eius intellectu et ex eius sensu dignitatis exortas. Sine ulla dubitatione

---

<sup>114</sup> Cfr. AAS 58 (1966), pp. 929-946.

imminutionem libertatis religiosæ sive hominum sive communitatum non tantum veluti acerbissimum quiddam illæ experiuntur, sed præcipue quasi ictum ipsi hominis dignitati illatum habent, etsi quæ sit religio, quidque de mundo sentiant, non consideretur. Libertatis religiosæ coercitio et violatio dignitati atque obiectivis iuribus hominis adversantur. Quid huiusmodi coercitio et violatio significant, satis aperte declarat documentum Concilii, quod supra memoravimus. Hæc profecto penitus lædunt ea, quæ intima sunt hominis eique vere propria et peculiaria. Ipsa incredulitas enim, religionis negligentia et atheismus, quatenus sunt res humanæ, tantum comprehenduntur, prout ad religionem et fidem referuntur. Quam ob rem difficile est, etiam ex iudicio « simpliciter humano », sententiam probare, iuxta quam solus atheismus civitate, ut ita dicamus, in vita publica et civili fruatur, cum, contra, quasi ex statuta norma, homines credentes vix tolerantur vel cives inferioris ordinis habeantur et etiam – ut iam accidit – omnibus iuribus civitatis priventur.

Id quoque, quamquam breviter, tractandum est, cum et ipsum ad multiplices condiciones hominis in mundo huius temporis pertineat idemque testetur quantum huiusmodi rerum status præiudicatis opinionibus variisque iniustitiis prægravetur. Si in hac ipsa re omittimus singula tangere – licet id facere Nostrum esset ius et

officium – id propterea facimus, quod una cum omnibus tormenta discriminis et persecutionis patientibus propter nomen Dei, fide potentiæ redemptricis, quæ est in Cruce Christi, ducimur. Sed pro officio Nostro, nomine omnium hominum toto orbe terrarum in Deum credentium, ab iis, quorum est quoquo modo vitam socialem et publicam ordinare, effragitamus vehementer, ut iura religionis et actionis Ecclesiæ observent. Non privilegium aliquod petitur, sed solum primarii iuris respectus. Huius iuris exercitatio maxime probat hominem vere in omni regimine, in omni societate, in omni institutionis forma, in omni systemate vel ambito profecisse.

#### IV

**18.** Hæc, etsi necessario brevis, inspectio condicionis hominis in mundo nostri temporis efficit, ut magis adhuc mentes et corda ad Iesum Christum dirigamus, ad mysterium Redemptionis, quo quæstio, ad hominem spectans, peculiari vi veritatis et amoris concluditur. Si Christus « cum omni homine quodammodo se univit », <sup>115</sup> Ecclesia, hoc mysterium eiusque uberes et universales rationes penitus perspiciens, altius e sua natura suoque munere vivit. Non frustra Apostolus de Corpore Christi, quod est Ecclesia, loquitur. <sup>116</sup> Si hoc Corpus Christi mysticum est Populus Dei – ut postea affirmavit Concilium

---

<sup>115</sup> Conc. Oecum. Vat. II, Const. past. de Ecclesia in mundo huius temporis Gaudium et Spes, 22 : AAS 58 (1966), p. 1042.



Vaticanum II, Divinarum Litterarum et Sanctorum Patrum traditione innixum – patet quemlibet eiusdem Populi hominem repletum esse illo spiritu vitæ, qui manat a Christo. Eo fit, ut hominem, eius vera problemata, spes et dolores, progressus et lapsus Ecclesia ipsa, quatenus est corpus, compages, unum quiddam sociale, considerando, eadem accipiat incitamenta divina, eadem lumina, easdem vires Spiritus, quæ a Christo Cruci suffixo et a mortuis excitato proficiscuntur : qua profecto de causa Ecclesia suam vitam vivit. Ecclesia non aliam habet vitam nisi eam, quam ei donat eius Sponsus ac Dominus. Nam, quia Christus in mysterio Redemptionis eam sibi iunxit, ob id ipsum oportet Ecclesia cum quolibet homine arcte coniungatur.

Hæc Christi cum homine coniunctio est in se mysterium, unde « novus homo » nascitur, vocatus ad vitam Dei participandam,<sup>117</sup> denuo in Christo creatus ad accipiendam plenitudinem gratiæ et veritatis.<sup>118</sup> Coniunctio Christi cum homine est vigor et fons vigoris, sicut acute dicit Sanctus Ioannes in prooemio Evangelii sui : « [Verbum] dedit... potestatem filios Dei fieri ».<sup>119</sup>

---

<sup>116</sup> Cfr. 1 Cor 6, 15 ; 11, 3 ; 12, 12 s. ; Eph 1, 22 s. ; 2, 15 s. ; 4, 4 s. ; 5, 30 ; Col 1, 18 ; 3, 15 ; Rom 12, 4 s. ; Gal 3, 28.

<sup>117</sup> Cfr. 2 Petr 1, 4.

<sup>118</sup> Cfr. Eph 2, 10 ; Io 1, 14. 16.

<sup>119</sup> Io 1, 12.

Hæc est illa vis, quæ interius hominem mutat, quasi principium novæ vitæ, nec evanescentis nec dilabentis, sed in vitam æternam manentis.<sup>120</sup> Quæ vita, singulis hominibus promissa et oblata a Patre in Iesu Christo, Filio æterno et Unigenito, incarnato et nato, « ubi venit plenitudo temporis », <sup>121</sup> e Virgine Maria, est extrema impletio vocationis hominis ; est quodammodo impletio illius « sortis », quam ab æternitate Deus homini præparavit. Ea « sors » divina via efficitur, transgrediens arcana omnia, res incognitas, sinus anfractusque « sortis humanæ » in hoc mundo temporali. Si enim hæc omnia, ad vitam ternpori obnoxiam et tamen bonis abundantem pertinentia, fatali necessitate ad terminum mortis perducunt et ad metam, ubi corpus humanum exstinguitur, Christus ultra illam metam nobis apparet : « Ego sum resurrectio et vita ; qui credit in me... non morietur in æternum. <sup>122</sup>In Iesu Christo Cruci suffixo, in sepulcro condito et inde resuscitato, « nobis spes beatæ resurrectionis effulsit », necnon « futuræ immortalitatis promissio » ; <sup>123</sup>quam tamen homo assequitur ex corporis morte, ita cum universo mundo hanc necessitatem, cui materia subiecta est, participando. Cupimus Nobisque propositum est

---

<sup>120</sup> Cfr. Io 4, 11.

<sup>121</sup> Gal 4, 4.

<sup>122</sup> Io 11, 25 s.

<sup>123</sup> Præfatio I in Missis Defunctorum.

huius veritatis sensum altius in dies perscrutari, quæ a Redemptore hominis his verbis est expressa : « Spiritus est qui vivificat ; caro non prodest quidquam ». <sup>124</sup> Quæ verba, quamvis id aperte non videatur, gravissimam affirmationem hominis enuntiant : affirmationem corporis, quod Spiritus vivificat.

Hanc realitatem Ecclesia vivendo experitur, ex hac veritate ad hominem attinente vivit ; unde licet ei brevis huius temporis spatium superare et pariter singulari amore et cura rebus omnibus consulere, quæ, huius finiti temporis ducta ratione, magnum momentum habent ad vitam hominis, ad vitam spiritus humani, qui illa perenni sollicitudine movetur, quam Sanctus Augustinus his verbis expressit : Domine, « fecisti nos ad te et inquietum est cor nostrum, donec requiescat in te ». <sup>125</sup> In hac feconda inquietudine quasi palpitat et pulsat id, quod potissimum hominis est : inquisitio veritatis, inexplebilis boni necessitas, libertatis appetitio, pulchri desiderium, vox conscientiæ. Ecclesia, studiosa contemplandi hominem quodammodo « oculis ipsius Christi », magis magisque conscia fit se custodem esse magni thesauri, quem dilapidari non liceat, sed qui continenter debeat augeri. Nam Dominus Iesus Christus dixit : « Qui non congregat mecum,

---

<sup>124</sup> Io 6, 63.

<sup>125</sup> Confess., I, 1 : CSEL 33, p. 1.

spargit ». <sup>126</sup> Ille humanitatis thesaurus, inenarrabili mysterio honestatus, quo datur filios Dei fieri, <sup>127</sup> atque gratia recipitur « adoptionis filiorum » <sup>128</sup> in Unigenito Filio Dei, per quem clamamus ad Deum : « Abba, Pater », <sup>129</sup> est et magna vis, quæ potissimum intrinsecus Ecclesiam coadunat eiusque toti actioni tribuit sensum. Ea vi Ecclesia coniungitur cum Spiritu Christi, cum Spiritu Sancto, quem Redemptor promisit, quem continenter impertit, quique, ut die Pentecostes, semper descendit. Ita ostenduntur in hominibus virtutes Spiritus, <sup>130</sup> dona Spiritus, <sup>131</sup> fructus Spiritus Sancti. <sup>132</sup> Et Ecclesia in mundo nostri temporis acriore in dies fervore sanctaque instantia videtur iterum atque iterum dicere : « Veni, Sancte Spiritus ». Veni ! Veni ! « Lava, quod est sordidum ! Riga, quod est aridum ! Sana, quod est saucium ! Flecte, quod est rigidum ! Fove, quod est frigidum ! Rege, quod est devium » ! <sup>133</sup>

Hæc ad Spiritum admota obsecratio, qua idem Spiritus impetretur, est refutatio earum huius temporis doctrinarum, quæ omnia ad

---

<sup>126</sup> Mt. 12. 30.

<sup>127</sup> Cfr. Io 1, 12.

<sup>128</sup> Gal 4, 3.

<sup>129</sup> Col 4, 6 ; Rom 8, 15.

<sup>130</sup> Cfr. Rom 15, 13 ; 1 Cor 1, 24.

<sup>131</sup> Cfr. Is 11. 2 s. ; Act 2, 38.

<sup>132</sup> Cfr. Gal 5. 22 s.

<sup>133</sup> Missale Rom., Sequentia in sollemnitate Pentecostes.

materiam referunt. Ex iis enim oriuntur inmultiplices cordis humani insatiabiles cupiditates. Precatio illa multis ex partibus auditur et diversimode videtur fructus afferre. Licetne affirmare non a sola Ecclesia eam fieri? Licet, quia rerum, ad spiritum pertinentium, « necessitatem » non pauci etiam exprimunt, qui extra fines aspectabiles Ecclesiae versantur.<sup>134</sup> Nonne id veritate illa confirmatur, quam tam subtiliter recens Concilium explanavit in Constitutione Apostolica a verbis Lumen Gentium incipiente, ubi (locet Ecclesiam esse « sacramentum seu signum et instrumentum intimae cum Deo unionis totiusque generis humani unitatis »)?<sup>135</sup> Illa Spiritui et per Spiritum adhibita obsecratio idem valet ac penetrare assidue in plenam rationem totius mysterii Redemptionis, quo Christus, cum Patre et cum singulis hominibus coniunctus, sine intermissione illum Spiritum dat nobis, qui sensus Filii nobis infundit et ad Patrem nos dirigit.<sup>136</sup> Hac ipsa de causa Ecclesia nostra aetatis – quae aetas est Spiritus avidissima, cum iustitiae, pacis, amoris, bonitatis, fortitudinis, officii conscientiae, dignitatis humanae sit appetens – oportet circa mysterium illud quasi se colligat et congreget, ut

---

<sup>134</sup> Cfr. Conc. Oecum. Vat. II, Const. dogm. de Ecclesia Lumen Gentium, 16 : AAS 57 (1965), p. 20.

<sup>135</sup> Ibidem, 1 : I. c., p. 5.

<sup>136</sup> Cfr. Rom 8, 15 ; Gal 4, 6.

inde lumen viresque necessarias hauriat ad manus suum implendum. Si enim, ut supra diximus, homo est via vitæ cotidianæ Ecclesiæ, oportet Ecclesia semper memor,<sup>137</sup> necnon destinationis ad gratiam atque ad gloriam.<sup>138</sup> Hæc omnia semper considerando atque fide magis magisque conscia et amore in dies firmiore accipiendo, Ecclesia simul aptior fit ad ministerium hominis, ad quod Christus Dominus eam vocavit, cum dixit : « Filius hominis non venit ministrari, sed ministrare ».<sup>139</sup> Ecclesia suum hoc munus exsequitur eo quod « triplex officium » Magistri sui Redemptoris cum eodem participat. Hæc doctrina, in fundamento biblico innixa, a Concilio Vaticano II in pieno lumine est posita, non sine magna vitæ Ecclesiæ utilitate. Cum enim triplicis ministerii Christi nos esse participes intellegimus, triplicis nempe eius muneris : sacerdotalis, prophetici et regalis,<sup>140</sup> magis etiam intellegimus ea, quibus Ecclesia, ut societas et communitas Populi Dei in terra, serviat oportet, simul mente comprehendentes quomodo unusquisque nostrum huius missionis et ministerii esse particeps debeat.

---

<sup>137</sup> Cfr. Rom 8, 15. 48.

<sup>138</sup> Cfr. Rom 8, 30.

<sup>139</sup> Mt 20, 28.

<sup>140</sup> Const. dogm. de Ecclesia Lumen Gentium, 31-36 : AAS 57 (1965), pp. 37-42.

19. Ita nobis, sacrae doctrinae Concilii Vaticani II lumine fulgente, Ecclesia apparet subiectum sociale, quod attinet ad conscientiae officium circa veritatem divinam. Vehementer commoti ipsum Christum audimus dicentem : « Sermo quem auditis, non est meus, sed Eius qui misit me, Patris ». <sup>141</sup> Nonne in hac Magistri nostri affirmatione illud conscientiae officium circa veritatem divinam perspicitur – quae est « ipsius Dei possessio » – si etiam ille, « Filius Unigenitus », qui vivit « in sinu Patris », <sup>142</sup> quando ut propheta et magister eam tradit, asseverandum sibi esse arbitratur se prorsus congruenter Fonti suo divino agere? Eadem fidelitas qualitas constitutiva fidei Ecclesiae esse debet, sive cum eam docet, sive cum profitetur.

Fides, utpote specialis virtus supernaturalis in spiritum humanum infusa, efficit, ut cognitionis Dei participes simus, eius Verbo revelato respondententes. Quocirca postulatur, ut Ecclesia, cum fidem profitetur ac docet, veritati divinae arcte inhæreat, <sup>143</sup> et hæc in vitæ actionem traducatur, quae sit « rationabile obsequium ». <sup>144</sup> Christus ipse, ut hanc fidelitatem erga veritatem

---

<sup>141</sup> Io 14, 24.

<sup>142</sup> Io 1, 18.

<sup>143</sup> Cfr. Const. dogm. de divina Revelatione Dei Verbum 5, 10, 21 : AAS 58 (1966), pp. 819 ; 822 ; 827 s.

<sup>144</sup> Cfr. Conc. Oecum. Vat. I, Const. dogm. de Fide catholica Dei Filius, cap. 3 : Conciliorum Oecumenicorum Decreta, Ed. Istituto per le Scienze Religiose, Bologna 1973, p. 807.

divinam in tuto collocaret, prompsit Ecclesiæ peculiare auxilium Spiritus veritatis, dono infallibilitatis <sup>145</sup> ornavit eos, quibus mandavit, ut hanc veritatem traderent atque docerent <sup>146</sup> – quomodo, ceterum, iam definivit Concilium Vaticanum I, <sup>147</sup> et postea confirmavit Concilium Vaticanum II <sup>148</sup> – et ille præterea totum Populum Dei singulari sensu fidei donavit. <sup>149</sup>

Inde huius muneris Christi, prophetæ, participes facti sumus et ex eodem munere cum eo servimus veritati divinæ in Ecclesia. Officium circa hanc veritatem assumptum etiam idem valet atque eam amare et curare, quo penitus cognoscatur, ita ut ad eam, cum tota vi salvifica, qua pollet, cum splendore, quo nitet, cum profunditate simul et simplicitate, quibus distinguitur, propius accedamus. Hic amor et hoc perspiciendi veritatem studium simul oportet progrediantur, ut res gestæ Sanctorum Ecclesiæ fidem faciunt. Qui germana luce illa maxime illuminabantur – quæ veritatem divinam illustrat ipsamque Dei realitatem ad mentes adducit – quia hanc veritatem complectebantur cum veneratione

---

<sup>145</sup> Cfr. Conc. Oecum. Vat. I, Const. dogm. I de Ecclesia Christi Pastor Aeternus : ed. cit., pp. 811-816 ; Conc. Oecum. Vat. II, Const. dogm. de Ecclesia Lumen Gentium, 25 : AAS 57 (1965), p. 30s.

<sup>146</sup> Cfr. Mt 28, 19.

<sup>147</sup> Cfr. Const. dogm. I de Ecclesia Christi Pastor Aeternus : loc. cit.

<sup>148</sup> Cfr. Const. dogm. de Ecclesia Lumen Gentium, 18-27 : AAS 57 (1965), pp. 21-33.

<sup>149</sup> Cfr. *Ibidem*, 12, 35 : AAS 57 (1965). pp. 16-17 ; 40-41.



et amore: amore imprimis erga Christum, Verbum vivens e veritate divina, et simul erga eius humanam manifestationem, quam Evangelium, traditio et theologia produunt. Nunc quoque huiusmodi et intelligentia et interpretatio Verbi divini sunt imprimis necessariae; tali theologia est opus. Theologia semper magni momenti fuit et est, ut Ecclesia, Populus Dei, feconde et fructuose prophetici muneris Christi particeps efficiatur. Quapropter theologis, cum veritati divinae inserviant incumbendo in studia et opera, quo altius veritas comprehendatur, nefas est oblivisci, quid eorum ministerium in Ecclesia significet, prout notione «intellectus fidei» exprimatur. Hæc notio habet vim bipartitam – si ita fas est loqui – iuxta illud: «Intellege, ut credas; crede, ut intellegas»;<sup>150</sup> et tunc recte eam vim exserit, cum theologi servire nituntur Magisterio, quod Episcopis in Ecclesia est traditum, hierarchico vinculo devinctis cum successore Petri, et cum horum curam in doctrina et pastoralis munere exercendo diuvant et cum apostolica officia fovant totius Populi Dei.

Ut antecedentibus ætatibus ita hodie quoque – et fortasse multo magis – theologorum et hominum doctrinis ornatorum in Ecclesia est fidem iungere cum scientia et sapientia, necnon operam conferre, ut hæ arctius inter se componantur, sicut legimus in colletta liturgica

---

<sup>150</sup> Cfr. S. Augustinus, Sermo 43, 7-9: PL 38, 257 s.

memoriæ Sancti Alberti, Ecclesiæ doctoris. Hoc munus hodie maxime est amplificatum, propter progressum sive humanæ scientiæ sive eius methodorum sive inventarum rerum, ad cognitionem mundi et hominis pertinentium. Hoc tangit tam disciplinar naturales accuratissimas quam scientias humanas et philosophiam, cuius vincula cum theologia Concilium Vaticanum II memoravit.<sup>151</sup>

In hac humanæ cognitionis regione, quæ continenter latius patet atque simul diversa efficitur, oportet etiam fides assidue altius perspiciatur, ostendendo amplitudinem mysteriî Revelationis et contendendo, ut veritas comprehendatur, cuius fons unicus et supremus est ipse Deus. Si licet – quod etiam exoptandum est – in huiusmodi immenso labore, iuxta hanc rationem exsequendo, quendam pluralismum, ut aiunt, attendere, nefas est tamen hunc laborem digredi a fundamentali unitate in doctrina fidei et morum tradenda, quæ unitas est finis eiusdem institutionis proprius. Necesse igitur est theologiam Magisterio diligentissime operam adiutricem præbere. Quilibet theologus peculiari modo conscius sit oportet eorum, quæ ipse Christus declaravit, cum dixit: « Sermo quem auditis, non est mens, sed Eius qui misit me,

---

<sup>151</sup> Cfr. Const. past. de Ecclesia in mundo huius teinporis Gaudium et Spes, 44. 57. 59. 62 : AAS 58 (1966), pp. 1064 s. ; 1077 ss. ; 1079 s. ; 1082 ss. ; Decr. de institutione sacerdotali Optatam Totius, 15 : AAS 58 (1966), p. 722.

Patris ». <sup>152</sup> Nemini idcirco licet theologiam trattare, quasi de quibusdam agatur notionum eius collectaneis sed quivis sciat oportet se arcte coniunctum esse debere cum hoc munere docendi, cum hoc munere veritatem docendi, quod Ecclesiæ ipsi incumbat.

Hæc prophetici muneris cum Christo ipso communicatio effingit vitam totius Ecclesiæ iuxta eius formam fundamentalem. Peculiaris participatio huius muneris propria est Pastorum Ecclesiæ, qui docent et continenter variisque modis nuntiant et tradunt disciplinam fidei morumque christianorum. Hæc institutio, quatenus sive missionalis est sive ordinaria, confert ad Populum Dei circa Christum congregandum, præparat animos ad Eucharistiam participandam, vitæ sacramentalis indicai vias. Synodus Episcoporum, anno MCMLXXVII convocata, singularem curam intendit in catechesim huius ætatis, et maturi veluti fructus, ex disceptationibus, experiētiis, suasionibus capti, mox, secundum sententiam illorum, qui Synodo interfuerunt, peculiari documento pontificio edentur. Catechesis profecto est perennis et simul primaria forma actionis Ecclesiæ, in qua charisma eius propheticum apparet: testificatio enim et institutio nequeunt inter se seiungi. Et quamvis hic potissimum de sacerdotibus agatur, fieri tamen non potest quin

---

<sup>152</sup> Io 14, 24.

etiam multi religiosi et religiosæ memorentur, qui moti amore Divini Magistri, catechesi tradendæ se dedunt, et quin de tot laicis mentio fiat, qui hoc opere fidem suam suamque apostolicam conscientiam manifestant.

Præterea, magis magisque curandum est, ut variæ catechesis formæ eiusque varii campi – ante omnia autem præcrpua catechesis « farniliaris » forma, qua scilicet parentes filios catechizant – comprobent totum Populum Dei muneris prophetici ipsius Christi esse participem. Oportet, ad hoc quod attinet, officium Ecclesiæ circa veritatem divinam implendum magis in dies variisque modis ab omnibus participetur. Et quid dicendum de hominibus diversarum scientiæ partium peritissimis, de cultoribus disciplinarum naturalium et litterarum, de medicis, de iuris consultis, de artificibus et technicis, (le præceptoribus, in varios gradus distinctis et speciales disciplinas callentibus ? Hi omnes – ut membra Populi Dei – muneris prophetici Christi suam partem habent et ministerii, eidem crediti, veritati serviendi, etiam se honeste gerendo erga veritatem, ubicumque hæc invenitur, alios ad veritatem informando eosque amore et iustitia maturescere docendo. Ita igitur officii conscientia circa veritatem unus ex primariis locis est, quo Ecclesia cum quolibet homine quasi congregitur, eademque pariter unum ex fundamentalibus postulatis est, quæ vocationem hominis in

communitate Ecclesiae inducunt. Ecclesia nostri temporis, officii conscientia circa veritatem ducta, perseveret oportet fidelis esse naturae propriae, ad quam munus propheticum, ab ipso Christo manans, pertinet: « sicut misit me Pater, et ego mitto vos... Accipite Spiritum Sanctum ». <sup>153</sup>

**20.** Intra Redemptionis mysterium, salutare videlicet opus a Iesu Christo impletum, Ecclesia non tantum particeps fit Evangelii Magistri sui per ipsam fidelitatem erga Verbum perque veritatis ministerium, sed pariter per subiectionem, spei et amoris plenam, participat virtutem redemptricis eius actionis, quam sacramentali forma, potissimum in Eucharistia, expressit ibique collegit. <sup>154</sup> Porro Eucharistia veluti centrum est totiusque sacramentalis vitae culmen, per quam nempe unusquisque Christianus Redemptionis vim accipit salutiferam, dum progreditur a mysterio baptismatis, in quo cum Christo consepelimur in mortem, usque ad Resurrectionis communicationem, <sup>155</sup> sicut Apostolus docet. Secundum hanc doctrinam magis etiam patet cur totius Ecclesiae ac singulorum Christianorum vita sacramentalis summam suam plenitudinemque attingat omnino in Eucharistia. In hoc enim Sacramento

---

<sup>153</sup> Io 20, 21 s.

<sup>154</sup> Cfr. Conc. Oecum. Vat. II, Const. de Sacra Liturgia Sacrosanctum Concilium, 10 : AAS 56 (1964), p. 102.

<sup>155</sup> Cfr. Rom 6, 3 ss.

continenter ex Christi voluntate renovatur sacrificii mysterium, quo Patri se ipsum in ara Crucis obtulit ; quod quidem sacrificium Pater suscepit ac vicissim pro eadem plena donatione Filii sui, qui erat « factus oboediens usque ad mortem », <sup>156</sup> donationem suam paternam reddidit, nempe donum novæ vitæ immortalis in ipsa Resurrectione, quandoquidem primus fons Pater est et dator vitæ iam iride a principio. Hæc vita nova, quæ corporalem glorificationem Christi Cruci affixi secum fert, fatta pariter est signum efficax novi illius doni hominibus traditi, quod est Spiritus Sanctus, per quem vita divina, quam habet in se Pater et Filio dat, <sup>157</sup> cunctis tribuitur hominibus, qui Christo coniunguntur.

Perfectissimum huius coniunctionis Sacramentum est Eucharistia. Nam celebrantes nos unaque Eucharistiam participantes, sociamur cum Christo terrestri et cælesti, qui pro nobis apud Patrem intercedit ; <sup>158</sup> at semper iungimur per redimentem sacrificii eius actum, quo is nos redemit, ita ut essemus « empti... pretio ». <sup>159</sup> illud « pretium magnum » Redemptionis nostræ item comprobatur momentum, quod ipse Deus adiudicat homini, confirmatque nostram in Christo

---

<sup>156</sup> Phil 2, 8.

<sup>157</sup> Cfr. Io 5, 26 ; 1 Io 5, 11.

<sup>158</sup> Cfr. Hebr 9, 24 ; 1 Io 2, 1.

<sup>159</sup> Cfr. 1 Cor 6, 20.

dignitatem. Cum enim constituimur filii Dei <sup>160</sup> ac filii adoptionis,<sup>161</sup> simul nimirum ad eius imaginem efficitur « regnum et sacerdotes », adipiscimur « regale sacerdotium », <sup>162</sup> hoc est participes reddimur illius unicæ et irrevocabilis restitutionis hominum mundique ad Patrem, quam is, æternus Filius <sup>163</sup> ac verus pariter Homo, in perpetuum semel peregit. Eucharistia proinde Sacramentum est, in quo plenius nova nostra significatur vita et in quo Christus sine intermissione novaque semper ratione ipse in Spiritu Sancto « testificatur » spiritui nostro <sup>164</sup> quemque nostrum, velut mysterii Redemptionis consortem, accedere posse ad fructus filiorum reconciliationis cum Deo,<sup>165</sup> quam perfecit ille continenterque inter nos perficiat ex Ecclesiæ ministerio.

Est hæc primaria veritas, non modo ad doctrinam verum etiam ad existentiam ipsam pertinens Eucharistia ædificat Ecclesiam<sup>166</sup> eamque exstruit ut veram communitatem Populi Dei, ut fidelium congregationem, signatam eadem unitatis nota, cuius participes fuerunt Apostoli

---

<sup>160</sup> Io 1, 12.

<sup>161</sup> Cfr. Rom 8, 23.

<sup>162</sup> Ap 5, 10 ; 1 Petr 2, 9. 54.

<sup>163</sup> Cfr. Io 1, 1-4. 18 ; Mt 3, 17 ; 11, 27 ; 17, 5 ; Mc 1, 11 ; Lc 1, 32. 35 ; 3, 22 ; Rom 1, 4 ; 2 Cor 1, 19 ; 1 Io 5, 5. 20 ; 2 Petr 1, 17 ; Hebr 1, 2.

<sup>164</sup> Cfr. 1 Io 5, 5-11.

<sup>165</sup> Cfr. Rom 5, 10. 11 ; 2 Cor 5, 18 s. ; Col 1, 20. 22.

<sup>166</sup> Cfr. Conc. Oecum. Vat. II, Const. dogm. de Ecclesia Lumen Gentium, 11 : AAS 57 (1965), p. 15 s. ; Paulus PP. VI, Allocutio d. 15 Sept. 1965 habita : Insegnamenti di Paolo VI, III, 1965, p. 1036.

primique Domini discipuli. Hanc insuper communitatem et unitatem semper ab integro ædificat; molitur semper eam ac reficit per Christi ipsius sacrificium, quoniam mortem eius in Cruce commemorat,<sup>167</sup> cuius pretio sumus ab eo redempti. Idcirco in Eucharistia – ut ita dicamus – tangimus mysterium ipsum Corporis ac Sanguinis Domini, perinde ac testantur verba ipsa institutionis eius momento prolata, quæ ob eiusdem institutionis vim facta sunt etiam verba perennis celebrationis Eucharistiæ ab iis, qui in Ecclesia ad hoc ministerium destinantur.

Ecclesia vivit ex Eucharistia; vivit ex plenitudine huius Sacramenti, cuius mirabilis essentia ac significantia sæpius illuminata est ab Ecclesiæ Magisterio iam a temporibus antiquissimis ad nostros usque dies.<sup>168</sup> Verumtamen dicere certo possumus hanc ipsam doctrinam – sustentatam acribus theologorum ingeniis et a profundæ fidei precationisque hominibus et ab ascetis ac mysticis secundum totam eorum fidelitatem erga eucharisticum mysterium – manere quasi in ipso limine, cum per eam comprehendi animo verbisque referri id non possit, quod Eucharistia in omni sua sit plenitudine et id, quod significet quodque in ea

---

<sup>167</sup> Cfr. Conc. Oecum. Vat. II, Const. de Sacra Liturgia Sacrosanctum Concilium, 47: AAS 56 (1964), p. 113.

<sup>168</sup> Cfr. Paulus PP. VI, Litt. Enc. Mysterium Fidei: AAS 57 (1965), pp. 553-574.



eveniat. Reapse Eucharistia est ineffabile Sacramentum ! Necessarium ideo officium atque imprimis gratia visibilis et origo supernaturalium virium Ecclesiæ ut Populi Dei nominatim hæc sunt : persistere et procedere constanter in eucharistica vita ac pietate, necnon spirituales profectus facere intra Eucharistiæ ambitum. Quapropter nobis multo magis non licet – neque in cogitationibus neque in vita neque in actibus – auferre ab hoc Sacramento vere sanctissimo plenam suam naturam propriamque significationem. Est pariter Sacramentum-sacrificium, Sacramentum-communio, Sacramentum-præsentia. Et quantumvis constet Eucharistiam fuisse semper etiamque nunc esse debere maximam ostensionem ac celebrationem fraternitatis humanæ discipulorum ac sectatorum Christi, tamen tractari non potest solum velut « occasio » quædam eiusdem fraternitatis declarandæ. Cum enim Corporis et Sanguinis Domini celebratur Sacramentum, necesse est simul observetur integra mysterii divini ratio ac plena vis huius signi sacramentalis, in quo Christus præsens realiter adest, « mens impletur gratia et futuræ gloriæ nobis pignus datur »<sup>169</sup>Hinc præterea officium exoritur religiose implendi liturgicas normas eaque omnia, quæ testantur communitatis ipsius cultum Deo

---

<sup>169</sup> Cfr. Conc. Oecum. Vat. II, Const. de Sacra Liturgia Sacrosanctum Concilium, 47 : AAS 56 (1964), p. 113. 56.

redditum, eo. vel magis quod in hoc sacramentali signo ille se nobis tradit cum fiducia infinita, quasi non consideret nostram infirmitatem humanani, nostram indignitatem, consuetudines nostras moresque cotidianos, immo vero etiam violationes, quæ fieri possunt. In Ecclesia igitur omnes, sed episcopi potissimum ac sacerdotes, vigilare debent, ut hoc amoris Sacramentum collocetur in media ipsa vita Populi Dei, ut per cunctos actus debiti cultus sic retribuatur Christo « amor pro amore », ut ipse revera fiat vita animarum nostrarum<sup>170</sup> Neque ex altera parte oblivisci urnquam poterimus horum Sancti Pauli verborum : « Probet autem se ipsum homo, et sic de pane illo edat et de calice bibat ». <sup>171</sup> Quæ Apostoli monitio saltem oblique coniunctionem arctam Eucharistiæ cum Pænitentia indicat. Etenim, si prima Christi doctrinæ sententia primaque Evangelii – id est « Boni Nuntii » – locutio fuit : « pænitemini et credite Evangelio » (metanoëite),<sup>172</sup> Sacramentum Passionis, Crucis, Resurrectionis videtur peculiari prorsus modo roborare et confirmare in animis nostris istam cohortationem. Sic quidem Eucharistia ac Pænitentia certo quodam sensu exhibentur velut duplex intusque simul coniuncta facies veræ vitæ secundum Evangelii spiritum : vitæ reapse

---

<sup>170</sup> Cfr. Io 6, 52. 58 ; 14, 6 ; Gal 2, 20.

<sup>171</sup> 1 Cor 11, 28.

<sup>172</sup> Mc 1, 15. 17.

christianæ. Nam Christus, qui ad Cenam nos eucharisticam invitat, idem ille ad pœnitentiam incitat, dum verbum iterat : « pœnitementini ». <sup>173</sup> Sine continua hac semperque renovata animi intentione ad conversionem, participatio Eucharistiæ privatur plena sua efficientia redemptrici, deficit vel saltem in ipsa minuitur peculiaris illa promptitudo Deo sacrificium spirituale offerendi, <sup>174</sup> in quo nostra participatio Christi sacerdotii patefit ratione essentiali et universali. In Christo enim iungitur sacerdotium cum proprio eius sacrificio et cum donatione Patri fatta ; quæ vicissim donatio – quippe quæ sine limite sit – efficit, ut nobis, qui homines sumus pluribils obnoxii angustiis, necesse sit ad Deum nos dirigamus modo usque maturiore et conversione constanti, semper quidem profundiore.

Proximis hisce annis plurima data est opera – ceterum omnino secundum antiquissimam Ecclesiæ traditionem – ut extolleretur communitaria ratio Pœnitentiæ et præsertim ipsius Sacramenti Pœnitentiæ in Ecclesiæ usu. Perutiles sane sunt hi conatus multumque certe adiuwabunt, ut praxis pœnitentialis Ecclesiæ nostrorum dierum ditescat. Attamen non oblivisci licet conversionem esse actum interiorem singularis profecto altitudinis, in quo nemo vices

---

<sup>173</sup> Ibidem.

<sup>174</sup> Cfr. 1 Petr 2, 5.

gerere valet alterius hominis, ubi communitas ipsa non « suffici » potest in locum uniuscuiusque hominis. Etsi fraterna communitas fidelium celebrationem pænitentialem simul peragentium insigniter provehit actum conversionis singulorum, nihilo minus oportet denique in hoc eodem actu se exprimat quisque homo ex intimis penetralibus conscientiae suae, immo cum toto sensu culpae suae fiduciaequae Dei, coram quo sistat psalmistae similis, ut confiteatur : « Tibi, tibi soli peccavi ».<sup>175</sup> Propterea Ecclesia, dum fideliter asservat productum plura per saecula usum Sacramenti Pænitentiae – hoc est usum confessionis singularis, copulatae cum actu doloris propositoque emendationis et satisfactionis – ius particulare animae humanae tuetur ; quod scilicet ius refertur ad congressionem, uniuscuiusque hominis magis propriam, cum Christo Cruci affixo, qui ignoscit, cum Christo, qui per Sacramenti Reconciliationis ministrum declarat : « dimittuntur peccata tua » ;<sup>176</sup> « vade, et amplius iam noli peccare ».<sup>177</sup> Uti plane perspicuum est, hoc pariter ius Christi est, quod is habet erga quemque hominem a se redemptum. Est nernpe ius conveniendi unumquemque nostrum in illo decretorio tempore vitae animae, quod est momentum conversionis et condonationis.

---

<sup>175</sup> Ps 50 (51), 6.

<sup>176</sup> Mc 2, 5.

<sup>177</sup> Io 8, 11.

Ecclesia Sacramento Pœnitentiæ custodiendo profitetur aperte fidem suam in Redemptionis mysterium, ut in rem veram et vivificantem, quæ etiam cum interiore veritate hominis congruit, cum humano culpæ sensu et etiam cum humanæ conscientiæ desideriis. « Beati, qui esuriunt et sitiunt iustitiam, quoniam ipsi saturabuntur ».<sup>178</sup> Pœnitentiæ porro Sacramentum est instrumentum, quo homo illa iustitia satiatur, quæ ex eodem Redemptore emanat. In Ecclesia, quæ præsertim nostris temporibus maxime circa Eucharistiam congregatur quæque exoptat, ut vera eucharistica communitas evadat signum omnium Christianorum coniunctionis, quæ paulatim maturescit, vigere debet necessitas pœnitentiæ, quod attinet sive ad rem sacramentalem<sup>179</sup> sive etiam ad illam rationem, ex qua Pœnitentia est virtus. Quæ altera ratio a Pontifice Maximo Paulo VI in Constitutione Apostolica Pœnitentini est explicata.<sup>180</sup> Unum officiorum Ecclesiæ est in actum deducere doctrinam ibidem expositam; siquidem de

---

<sup>178</sup> Mt 5, 6.

<sup>179</sup> Cfr. S. Congregatio pro Doctrina Fidei. Normæ pastorales circa absolutionem generali modo impertiendam : AAS 64 (1972), 510-514 ; Paulus PP. VI, Allocutio ad nonnullos Episcopos e Foederatis Civitatibus Americæ Septentrionalis. oblata occasione eorum visitationis « Ad limina » habita (20 Apr. 1978 : AAS 70 (1978), pp. 328-332 ; Ioannes Paulus PP. II. Allocutio ad quosdam sacros Præsules nationis Canadensis habita, eorum visitationis « Ad limina » oblata occasione (17 Nov. 1978) : AAS 71 (1979) pp. 32-36.

<sup>180</sup> AAS 55 (1966) pp. 177-198. 59.

argumento agitur, quod sine dubio a Nobis adhuc altius pervestigari oportebit per communem considerationem et circa quod plura alia consilia capienda erunt cum sensu collegialis formæ pastoralis et cum observantia erga varias traditiones, huc spectantes, et erga diversa adiuncta vitæ hominum nostræ ætatis. Quidquid autem id est, patet Ecclesiam novi Adventus, Ecclesiam, quæ sese continenter præparet ad novum Domini Adventum, esse plane debere Ecclesiam Eucharistiæ et. Pænitentia. Secundum hanc solam visionem spiritualement sui vigoris sui que operis ipsa est Ecclesia divinæ missionis, Ecclesia in stata missionis, quemadmodum eius veluti vultum Concilium Vaticanum II ostendit.

**21.** Cum Vaticanum Concilium II ab ipsis fundamentis propriis imaginem Ecclesiæ ut Populi Dei effingeret – indicato videlicet triplici munere Christi ipsius, cuius cum participes fimus, vere Populus Dei constituimur – extulit etiam qualitatem istam peculiarem christianæ vocationis, quam nuncupari fas est « regalem ». Ut omnes divitiæ et thesauri doctrinæ Concilii recte explanarentur, hic iam necesse esset mentionem creberrimam facere complurium capitum et articulorum Constitutionis a verbis Lumen Gentium incipientis multorumque aliorum documentorum eiusdem Concilii. Attamen inter abundantiam istam doctrinarum una pars profecto eminere videtur: participatio regalis

muneris Christi, quatenus unusquisque detegit in se et in aliis peculiarem vocationis nostræ dignitatem, quæ «regalitas» potest nominari. Hæc quidem dignitas monstratur in prompta serviendi alacritate secundum Christi exemplum, qui «non venit ministrari sed ministrare».<sup>181</sup> Si igitur secundum illum Christi habitum vel affectum aliquis «regnare» proprie valet dumtaxat «serviando», simul postulat illud «serviendi» officium talem maturitatem spiritualem, quæ dicenda sit prorsus significare aliquem «regnare». Ut quis ideo digne efficaciterque ceteris inserviat, oportet is dominetur in semet ipsum possideatque virtutes, quæ permittant, ut ita dominetur. Nostra participatio regalis missionis Christi – illius quidem «muneris regalis» – arcto vinculo cohæret cum omni regione doctrinæ moralis, tam christianæ quam etiam humanæ.

Concilium Vaticanum II, cum integram præbuit Populi Dei imaginem cumque docuit quem locum in ipso obtinerent non soli sacerdotes verum etiam laici nec soli participes sacræ Hierarchiæ sed sodales etiam Institutorum vitæ Deo consecratæ, non sane duxit imaginem istam ex principiis dumtaxat sociologicis. Ecclesia quidem, quatenus humana est societas, potest investigari ac definiiri secundum regulas seu criteria, quibus in doctrinarum disciplinis homines utuntur quoad quamvis societatem humanam.

---

<sup>181</sup> Mt 20, 28.

Attamen istæ regulæ haud sufficiunt. Etenim in tota communitate Populi Dei singulisque eius membris non iam agitur tantum de peculiari « vinculo sociali », sed potius requiritur, tamquam res unicuique et omnibus necessaria, specialis « vocatio ». Nam Ecclesia, ut Populus Dei – secundum memoratam Sancti Pauli doctrinam mirabiliter a Pio XII expositam – est etiam « Mysticum Corpus Christi ». <sup>182</sup> Ius ad illud Corpus pertinendi procedit ex particulari invitatione, ad quam actio salvifica gratiæ accedit. Si vere conscii nobis esse cupimus huius communitatis Populi Dei – tam ampliæ maximeque variæ – debemus Christum imprimis contemplari, qui aliquo modo cuique istius communitatis membro dicit « sequere me ». <sup>183</sup> Hæc est communitas discipulorum, quorum unusquisque, alia quidem ratione – interdum valde conscia sibi que constanti, nonnumquam parum conscia et admodum inconstanti – sequitur Christum. Inde etiam commonstratur qualitas admodum « personalis » ac proprietas huius societatis, quæ – licet multum deficiat ipsius communitaria vita, secundum sensum humanum istius verbi – idcirco tamen omnino communitas est, quod omnes illam efficiunt una cum Christo ipso, saltem eo quod in animis suis signum gerunt indelebile, proprium eius, qui Christianus est.

---

<sup>182</sup> Pius PP. XII, Litt. Enc. Mystici Corporis : AAS 35 (1943), pp. 193-248.

<sup>183</sup> Io 1, 43.



Idem Concilium Vaticanum II operam potissimum dedit, ut explicaret quomodo hæc ontologica communitas discipulorum et confessorum magis usque fieri deberet – etiam « humana » ratione – communitas sibi conscia propriæ vitæ et actionis. Incepta Concilii hac in re iam continuantur in pluribus ulterioribusque operibus indolem synodalem et apostolicam et organicæ dispositionis præ se ferentibus. Ante oculos tamen semper hoc verum constituere debemus : eatenus quodlibet coeptum prodest sinceræ renovationi Ecclesiæ et eatenus idem adiuvat, ut diffundatur germanum « Lumen, quod est Christus », <sup>184</sup> quatenus id innititur in consentanea conscientia tum vocationis tum officii circa hanc gratiam singularem, unicam minimeque iterabilem, per quam Christianus quisque in Populi Dei communitate Christi Corpus ædificat. Principium hoc, quod primaria norma est totius vitæ et actionis christianæ – vitæ quidem apostolicæ et pastoralis, vitæ interioris et socialis – applicandum est, iusta proportione servata, ad cunctos homines et ad unumquemque eorum. Etiam Summus Pontifex, haud secus ac quisque Episcopus, illud debet ad se ipsum adhibere. Eidem præterea principio pareant oportet sacerdotes, religiosi ac religiosæ. Secundum hoc vitam suam instruere necesse est

---

<sup>184</sup> Cfr. Conc. Oecum. Vat. II, Const. dogm. de Ecclesia Lumen Gentium, 1 : AAS. 57 (1965), p. 5.

coniuges et parentes, necnon mulieres et viros diversæ quidem conditionis ac munerum perfunctionis, ab iis, qui in societate summa munera explent, usque ad eos, qui opera humillima curant. Hoc namque principium est illius « ministerii regalis », quo ex Christi exemplo singillatim officium accipimus eo pertinens, ut quisque a se ipse postulet id omnino, ad quod vocatus est ad quodque nominatim obstrictus est, ut, adiuvante Dei gratia, propriæ vocationi valeat respondere. Hæc deinde fidelitas erga vocationem a Deo per Christum receptam secum infert illud commune circa totam Ecclesiam officium conscientiæ, ad quod Concilium Vaticanum II Christianos omnes studet educare. Etenim in Ecclesia, ut in Populi Dei communitate a Spiritu Sancto directa, « unusquisque proprium habet donum », <sup>185</sup> quemadmodum Sanctus Paulus docet. Quod quidem « donum », tametsi vocatio personalis est ac forma, qua particeps aliquis fit operæ salutiferæ Ecclesiæ, aliis tamen simul servit et Ecclesiam fraternasque communitates variis in provinciis vitæ humanæ in terris ædificat.

Fidelitas erga vocationem – id est animus constanter paratus et promptus ad « ministerium regale » – magnum pondus habet ad multiplicem illam ædificationem, præsertim quod ad maioris momenti munera spectat, quæ altius vitam proximi totiusque societatis afficiunt. In tali

---

<sup>185</sup> I Cor 7, 7 : cfr. 12, 7, 27 ; Rom 12. 6 : Eph 4. 7.

fidelitate erga propriam vocationem excellere debent ipsi coniuges, uti postulatur ex indissolubili natura sacramentalis institutionis matrimonii. Similiter eminere decet sacerdotes pari fidelitate erga propriam vocationem ; id quod poscit character indelebilis, quem Sacramentum Ordinis in ipsorum animis figit. Nam hoc Sacramentum cum recipimus, obstringimus nos, in Ecclesia Latina, conscii ac liberi officio vivendi in cælibatu ; quocirca unusquisque nostrum debet, quantum sane in eo situm est, efficere, ut Dei gratia sustentatus, gratus de hoc dono sit ac semper fidelis officio, quo in omne tempus se obligavit. Neque aliud profecto flagitatur a coniugibus, qui contendere debent omnibus viribus, ut in vinculo matrimoniali perseverent utque per illam amoris testificationem exstruant communitatem familiæ novasque generationes hominum educent, qui et ipsi vicissim valeant totam suam vitam dedicare propriæ vocationi – videlicet « ministerio regali » – cuius speciem pulcherrimumque exemplum<sup>186</sup> nobis Iesus Christus præbuit. Ecclesia eius, quam omnes nos componimus, existit « propter homines », ea mente ut secundum Christi exemplum ac per auxilium gratiæ, nobis ab eo impetratæ, possimus consequi tandem illud « regnare », nempe maturam humanitatem in

---

<sup>186</sup> Cfr. Conc. Oecum. Vat. II, Const. dogm. de Ecclesia Lumen Gentium, n. 36 : AAS 57 (1965), pp. 41 s.

nostrum unoquoque efficere. Matura vero humanitas significat usum plenum doni libertatis, quod a Creatore tum recepimus, cum ad vitam is hominem vocavit factum « ad imaginem suam ». Hoc insuper donum plane perficitur in donatione – quæ sit sine ullis condicionibus – propriæ totius personæ humanæ, ex affectu amoris sponsalis in Christum et cum Christo in eos omnes, ad quos ipse mittit viros ac mulieres, qui penitus secundum consilia evangelica ei sunt consecrati. Ecce optimam vitæ religiosæ effigiem, quam Ordines et Congregationes – cum antiqui tum recentes – et Instituta Sæcularia sibi asciverunt.

Hisce temporibus falso nonnumquam libertas creditur finis sibi met ipsi esse, homo tunc liber esse, cum libertate utitur, uti libet, huc igitur in vita singulorum hominum ac societatum esse contendendum. Attamen libertas est donum præstabile dumtaxat, cum eam consciîi usurpare scimus ad omnia, quæ vere bona sunt. Docet enim nos Christus optimum libertatis usum esse caritatem, quæ in dono ac ministerio compleatur. « Hac libertate nos Christus liberavit »<sup>187</sup> semperque liberat. Hinc præterea sine intermissione haurit Ecclesia incitamentum et invitamentum et impulsus ad exsequendum proprium munus ac ministerium inter omnes homines. Plena igitur veritas de humana libertate in Redemptionis mysterio est alte recondita.

---

<sup>187</sup> Gal 5, 1 ; cfr. ibidem 13.

Hominum generi Ecclesia reapse inservit, cum eandem veritatem tuetur indefatigabili mentis intentione et ardenti amore et studio maturo atque cum in universa sua communitate, per fidelitatem erga vocationem cuiusque Christiani, transmittit et solida forma hanc veritatem in vita hominum exprimit. Hoc demum modo confirmatur id, quod iam superius memoravimus: nempe hominem esse fierique semper «viam» vitæ cotidianæ Ecclesiæ.

**22.** Cum ergo ipso novi Pontificatus initio ad Redemptorem hominis cogitationes Nostras et cor Nostrum convertimus, hoc modo ingredi cupimus et penetrare in intimum cursum vitæ Ecclesiæ. Quodsi Ecclesia vitam sibi propriam vivit, id propterea fit quod illam haurit e Christo, qui id unum expetit, nempe ut vitam habeamus et abundantius habeamus.<sup>188</sup> Illa vero plenitudo vitæ, quæ est in ipso, simul in utilitatem hominis confertur. Quare Ecclesia, eo quod universis divitiis mysterii Redemptionis communicat, Ecclesia fit hominum viventium, qui vivunt, quia intus opera « Spiritus veritatis »<sup>189</sup> vivificantur, quia caritate, quam Spiritus Sanctus in cordibus nostris diffundit,<sup>190</sup> visitantur. Cuique ministerio in Ecclesia, sive apostolicum est sive pastorale sive sacerdotale sive episcopale, propositum est,

---

<sup>188</sup> Cfr. Io 10, 10.

<sup>189</sup> Io 16, 13.

<sup>190</sup> Cfr. Rom 5, 5.

ut hoc vinculum dynamicum mysterii Redemptionis cum unoquoque homine servetur. Quodsi huiusmodi consciū sumus officii, melius intellegere videmur, quid significet Ecclesiam esse matrem <sup>191</sup> atque etiam quantum intersit Ecclesiam semper, ac quidem potissimum hisce temporibus, opus habere matre. Peculiarem gratiam debemus Patribus Concilii Vaticani II, quod in Constitutione, a verbis Lumen gentium incipiente, uberi cum doctrina mariologica, quæ illa continetur,<sup>192</sup> hanc veritatem edixerunt. Quoniam Paulus VI, hanc ipsam doctrinam secutus, Matrem Christi esse « Matrem Ecclesiæ »<sup>193</sup> proclamavit atque tale nomen valde increbruit, liceat etiam indigno eius successori, in extrema parte harum considerationum, quas in exordio pontificalis ministerii ipsius proponi convenit, ad Mariam, ut Matrem Ecclesiæ, se convertere. Maria est Mater Ecclesiæ, quia ex ineffabili electione per ipsum Aeternum Patrem peracta atque peculiari <sup>194</sup> Spiritus Amoris operante virtute,<sup>195</sup> vitam humanam dedit Filio Dei,

---

<sup>191</sup> Cfr. Conc. Oecum. Vat. II, Const. dogm. de Ecclesia Lumen Gentium, 63-64 : AAS 57 (1965), P. 64.

<sup>192</sup> Cfr. cap. VIII, 52-69 : AAS 57 (1965), pp. 55-67.

<sup>193</sup> Allocutio in Vaticana Basilica inibita, tertia esatta Oecum. Concilii Vaticani II Sessione (21 Nov. 1964) : AAS 56 (1964), P. 1015.

<sup>194</sup> Cfr. Conc. Oecum. Vat. II, Const. dogm. de Ecclesia Lumen Gentium, 56 : AAS 57 (1965), p. 60.

<sup>195</sup> Ibidem.

« propter quem omnia et per quem omnia »<sup>196</sup> et a quo totus Populus Dei gratiam et dignitatem electionis suæ accepit. Proprius eius Filius maternitatem Genetricis suæ expresse extendere voluit – atque eo modo extendere, ut omnibus anirnabus et cordibus facile pateret – cum discipulum, quem potissimum diligebat, ei ut filium a summa Cruce ostenderet.<sup>197</sup> Spiritus Sanctus ei insinuavit, ut, post Ascensionem Domini nostri, in Cenaculo maneret, precationibus intenta et in exspectatione una cum Apostolis versans usque ad diem Pentecostes, quo Ecclesia visibiliter est nata, quasi ex obscuro in medium prodiens.<sup>198</sup> Exinde omnes generationes discipulorum et universorum, qui Christum profitentur et amant – quemadmodum Ioannes Apostolus fecit – spirituali ratione acceperunt in sua<sup>199</sup> eam Matrem, quæ hoc modo ab ipsis initiis, id est a tempore Annuntiationis, in historiam salutis et in missionem Ecclesiæ est inserta. Nos cuncti ergo, qui hac ætate generationem discipulorum Christi efficimus, peculiariter ei cupimus iungi. Quod quidem agimus penitus inhærentes veteri traditioni et simul plane reverentes et amore complectentes membra omnium Communitatum christianarum.

---

<sup>196</sup> Hebr 2, 10.

<sup>197</sup> Cfr. Io 19, 26.

<sup>198</sup> Cfr. Act 1, 14 ; 2.

<sup>199</sup> Cfr. Io 19, 27.

Quod quidem facimus permagna necessitate fidei, spei et caritatis compulsi. Re enim vera, si bisce rerum ecclesiasticarum et humanarum temporibus difficilibus officiumque conscientiae postulantis peculiariter nobis opus esse persentimus, ut ad Christum convertamur, qui vi mysterii Redemptionis est Dominus Ecclesiae suae ac Dominus historiae hominum, probe arbitramur neminem ut Mariam nos inducere posse in rationem divinam et humanam eiusmodi mysterii. Nemo ut Maria eo introductus est ab ipso Deo. In hoc quippe singularis indoles gratiae maternitatis divinae consistit. Non solum est unica minimeque iterabilis huius maternitatis dignitas in humani generis historia, sed unica etiam – quod attinet ad eius profunditatem et ad amplitudinem eius actionis – participatio est, qua Maria, propter eandem maternitatem, consilio divino de salute humana communicavit per mysterium Redemptionis.

Hoc ipsum mysterium – si ita loqui possumus – sub corde Virginis Nazarethanae est effectum, cum haec illud « fiat » pronuntiavit. Ex quo tempore virgineum eius simulque maternum Cor, peculiari Spiritus Sancti operante virtute, semper Filii sui opus persequitur et omnibus se obviam dat, quos Christus inexhausta caritate sua complexus est et continenter complectitur. Hac de causa etiam Cor Mariae item inexhausto affectu materno debet praeditum esse. Nota autem



huiusce amoris materni, quo Dei Genetrix mysterium Redemptionis et vitam Ecclesiæ prosequitur, exprimitur eo quod singulariter homini atque omnibus eius vicissitudinibus propius adest. In hoc enim mysterium Matris est positum. Ecclesia, quæ eam amore et spe peculiari intuetur, huiusce mysterii modo in die latiore compos fieri desiderat. In hoc enim Ecclesia etiam viam vitæ suæ cotidianæ, quæ unusquisque est homo, agnoscit.

Aeternus Patris amor, qui in historia humani generis per Filium est manifestatus, quem Pater dedit, « ut omnis qui credit in eum non pereat, sed habeat vitam æternam »<sup>200</sup> nobis offertur per hanc Matrem atque hoc modo signa accipit ad intellegendum accommodatiora et faciliora cuique homini. Ita fit, ut Maria in omnibus viis cotidianæ vitæ Ecclesiæ versetur oporteat. Eo quod ut Mater præsens adest, Ecclesia certum habet se reapse vitam vivere Magistri sui et Domini, se e mysterio vivere Redemptionis cum tota eius vivificatoria plenitudine. Eidem pariter Ecclesiæ, quæ in pluribus variisque campis vitæ universorum, qui nunc sunt, hominum veluti radicatur, etiam compertum est eademque, ut ita dicamus, experitur se cum homine, cum unoquoque homine, esse coniunctam, se huius esse Ecclesiam, scilicet Ecclesiam Populi Dei.

---

<sup>200</sup> Io 3, 16.

Huiusmodi contuentes officia, quæ Ecclesiæ vias terentibus oriuntur, illas dicimus vias, quas Paulus PP. VI in primis Pontificatus sui Encyclicis Litteris aperte commonstravit, Nos, probe conscii summæ necessitatis omnium eiusmodi viarum simulque difficultatum, quæ in iis superveniunt, eo magis opus nobis esse persentimus arctissimo vinculo, quo Christo iungamur.. Resonant in animo, quasi canora vocis imago, verba, quæ ipse est elocutus : « sine me nihil potestis facere ».<sup>201</sup> Non solum necessitatem, sed etiam imperativum categoricum sentimus, unde fiat, ut tota Ecclesia magnopere, impense, crebrius in dies preces fundat. Solum enim precatio efficere potest, ne permagna hæc officia et difficultates, quæ accidunt continenter, in causas discriminum vertantur, sed ut fontes ac velut fundamenta evadant novorum egregie factorum, quæ parentur atque in dies magis maturescant, in itinere Populi Dei Terram Promissionis versus, ac quidem hoc ipso rerum cursus tempore, quo ad finem alterius millennii appropinquamus.

Dum ergo huic quasi meditationi finem imponimus, acriter humiliterque ad precationem faciendam evocantes, cupimus, ut in hac oratione perseveretur cum Maria, Matre Iesu,<sup>202</sup> quemadmodum perseverarunt Apostoli ac

---

<sup>201</sup> Io 15, 5.

<sup>202</sup> Cfr. Act 1, 14.

discipuli Domini in Cenaculo Hierosolymitano, post illius Ascensionem.<sup>203</sup> Enixe potissimum Mariam, cælestem Ecclesiæ Matrem, deprecamur, ut in hac oratione, quæ in novo Adventu fit humani generis, nobiscum manere dignetur, qui Ecclesiam efficitur, id est Corpus mysticum Filii eius Unigeniti. Speramus fore ut, huiusmodi precationis vi, accipiamus Spiritum Sanctum supervenientem in nos <sup>204</sup> et hoc modo testes fiamus Christi « usque ad ultimum terræ », <sup>205</sup> quemadmodum illi, qui die Pentecostes e Cenaculo Hierosolymitano exierunt. Denique Benedictionem Apostolicam amantissime impertimus.

Datum Romæ, apud Sanctum Petrum, die IV mensis Martii, Dominica I in Quadragesima, anno MCMLXXIX, Pontificatus Nostri primo.

IOANNES PAULUS PP. II

---

<sup>203</sup> Cfr. Act 1, 13.

<sup>204</sup> Cfr. Act 1, 8.

<sup>205</sup> Ibidem.